

Rom

¹ I asęta, Yesu Kerisoné kutó diratere whi Pol-né dapó. Kótóné ama fo wisi yó maté kweyópóló, ą beterepaae ape yóló, ę *aposel* whi sóró beteralepó.

² Yesu Keriso ą waai teópatei, Kótóné kóló whirapené so whi tao saaire fo wisi waalopóló, yóló mulale fo ama kae muló betere *buk*-mó aseyóló mulélipakalepó. Ai fota me kae mei, Kótóné ama naalemamó erapó.

³⁻⁴ ą mo tiki daaleiteita, ti Depit-né deté wale whiné deyaleteiné erapó. Mo kae beterótu betere Dei Kepe Wisiné ą Kótóné Naalema mo doasi fotokó bole whipóló so whi feané kisipa yópóló hakearaleteita, ą sukaletei momó kepaayale alané eralepó. ą me kae mei, ą teteróló kaae tare whi Yesu Kerisotórótípó.

⁵ Yesuné ama doi doasi muópóló, Kótóné ąpaae matepa amamo hamokoróló ąpaae *aposel* kutó melalepó. Atéyaleteita, Juda meire fake so whi fea Yesu Keriso beterepaae wóló, ąpaae kisipa tiki tiróló ama fo aómó sukóló beterópóló, ai fo yó maté kweyae yóló, ą sóró beteralepó.

⁶ Diąkéle Yesu Kerisoné ą beterepaae ape yóló, ama fake so whitamo touró betereiteiné mo ama so whitóró beterapó.

Pol Rom-paae faai yale fo

⁷ ąlo i dere asęta, Rom bemó betó mole Kótóné yaala sókó furaalu ą beterepaae ape yóló, sóró kae beteró betere so whipaae dapó. Térapa, ąné Aya Kótóró Tale Yesu Kerisotamoné hamokoróló

tao sere alaró hosaa muni deyóló mo dua betere alatamo, diã feapaae eróppóló yae.

⁸ Yálo folosóró dere fo i ape. Diã Talepaae tué tiki tiró beterapóló, i hae kwiamó betó mole so whiné deté fupa yálo wosalepó. Diã fea atéró betepa, ẹ Yesu Keriso tuámó bitu, ẹ tẹteróló kaae tare Kótópaae mo kée du beterapó.

⁹ Kótóné ala eróturaalu, yálo hosaa tuámó doasi ketekẹ buóló, ama naalemané fo wisi so whi feané wosóppóló i yó mótu betere ape. Ai Kótóné keletómó, betere dokọ yálo diã kisipa keteréni, diámó moma hãle eró taretei ama mo kisiparapó.

¹⁰ Atéró moma deté wou beteretei, mió mo dokonóturaalu ẹ diã beterepaae wóppóló, Kótóné ama tų aleraai kisipa mupa, ti ai ala mo eróppóló du beterapó.

¹¹ Dẹi Kepe Wisiné ẹ tuápaae hamokoróló erale ala wisi diã fotokọ buóló beteróppóló, yálomo diã melaai ẹ diã beterepaae mo wonée du beterapó.

¹² Ẹ diã beterepaae wonée du betereteita, hãle meipó. Diaaọ Talepaae kisipa tiki tiró betere alané ẹ ketekẹ bulóo, yálo kisipa tiki tiró betere alané diákélé ketekẹ bulóo yaai kisipa mutu waai dapó.

¹³ Ne norape-ó, yálo i dere fo diáné kisipa yaasepóló diriyóló wosae. Ẹ mepaae Juda meire fake tuápaae fóló, Kótóné ala eróló du olerótu yale kaae, diã tuápaaekélé ai ala eraai kisipa mutu wonée du beteretei mepaae alané sesé deté wóló, miókélé ai alatóró hãle du beterapó.

¹⁴ Ẹta, Krik fo bole whiró kae be fo bole whitamokélé, *skul* yóló doasi kisipa sere whiró *skul* ini mo hãle betere whitamopaaekélé i fo wisi yó matere ala Talené ẹpaae dirae yóló melale kutó

ereteiné taaréni, feapaae mo eraai doasi keteke bulapó.

¹⁵ Atére betené, diã Rom bemó betó mole so whípaaekélé kale fo wisi yó matere ala ę wini, halaainé yó melaai mo doasi keteke bulapó.

¹⁶ Ti ai fo wisi tuamóta, Kótóné ama fotokọ boleteiné ai fo wosóló tuę tiki tiró betere so whi fea aluyaqsóró, tao saaire fopóló kisipa mutu, ę wini halaainé yó mótu beterapó. Ai fo wisi folosóró Juda fake so whípaae yó melóló, nalo ti Juda meire fake so whípaae i yó mótu betere ape.

¹⁷ I fo wisinéta, Kótóné keletómó mo donoí so whi beteratere ala i ape yóló, hakearóló yó mótu beterapó. Ti ai donoí alata, kaae sóró deté fóló kemene folepaaekélé me alané sumitei, kisipa tiki tiratere alané betã sua dapó. Ti aita, asęmó ere fo kaaepó. “Mo donoí so whiãta, kisipa tiratere alanétóró bitiré faalopó,” erapó.

Kótó fopaae butu erótu betere ala

¹⁸ Tépateti, i haemó betó mole so whiné Kótó betere kisiparutei, bitini nisyóló ama fo wosaalo hóróló, kae kae du betere dowi alané kale bete mole mo fo wisi aluróló husirótu beterapó. Atétu betepa Kótó hepen bemó bitu, ai dowi alatamo fopaae boletei so whi feané kolópóló, hakearótu beterapó.

¹⁹ Ti ama ai fopaae butere alata hãle mei, Kótó ą etei kaae Tale beterapóló so whiné kisipa yópóló, amatei ą hakearóló yó mótu betalepó.

²⁰ Mo take Kótóné i haeró yó mole ęla ęlatamo kaarale alimó kaae sóró bitiré wale so whinékéle, mió i alimó betó mole so whinékéle, Kótó ą tuamó

ere ala kelené kelenénipó. Tépatéi, ama aleyóló muló betere ɔla ɔla kilituraalu, i ere ɔla ɔla feata, mo ti betere Kótóné doasi fotokóné alerapóló kisi-parapó. Atére betené fo tokótamo yóló taletere alimó, Kótópaae ya betere kisipa iniru yalepóló, ama kisipa felératere fokélé mo yaalomeipó.

²¹ Ti noatepae, Kótó atimané kisipa irutei, Talepóló ama doi doasi muópóló hale horatere ala ó mó kée dere fokélé dua inipó. Téturaalu, atimané mole tuę tikikélé okoko iru, hosaakélé mo tóru yóló diliki yó falepó.

²² Ti atimanétei ɗata, tuę tiki fosó fosó yóló dotoróę fale whırape beterapó du betepatei, atima okokoi whı alée fóló beterepó.

²³ Atéru, sukókélé ini, ama kae ere ɗe wisi-naale faane Kótó betepatei, kelené kilinipóló taalóturaalu, kelené keletere ɔla ɔlatei, Kótó sųróló whıné naasené aletua yalepó. Ti ai aletua dere ɔlata, whı ó ba, na, hupu, wuli, aita sukutua dere ɔlarapetei sųróló aleóló aso daaróló, atimané Kótópóló momatua yalepó.

²⁴ Atétu betale betené atima hosaa tuámó eķele yóló du betere dowi ala mo ti fakeyóló so ó whı hamomatamotei nópu nokole ala du betepa, Kótóné sesé ini, mo ti deté fu beterópóló taaralepó. Atétepa, hale deté fu betale mo sonaalei dowi alané atima tikitei folokoleróló, u doręle i doręle du betalepó.

²⁵ Atéturaalu, Kótóné mo fo wisi taaróló, kapala fotei tao tawalepó. ɔla ɔla fea aleyóló muló betere Tale betepatei ą aqómó sukóló bitini, ama aleyóló muló betere ɔla suka, kósupó, hupu, na, hasi, ni atimané talepóló aqómó sukóló bitu, ai ɔla ɔlané

hēkesere ala eróló momatu betalepó. Ai ọla ọla feata, Kótóné aleóló muló betereteiné ama doi betà hale sóró horóló, mo kée fo du betenérápó.

²⁶ Atima atei ala hāle du betepa, mepaae mo sonaalei dowi alakélé ekẹle yóló hāle deté fu beterópóló, Kótóné seséni taaralepó. Sorape atima whịtamo dere ala taaróló, so hamomatamotei dowi ala du betalepó.

²⁷ Soné ai dere ala kaae, whịrapenékélé sotamo dere ala taaróló, whị hamomatamotei yaaire dowi ala atimané hosaa tuámó si kaae dukuraalu, ekẹle yóló du betalepó. Whịné yópóló Kótóné muló betere donoi tų mupatei taaróló, whị hamomatamotei sonaalei ala du betaletimó, Kótóné matere dowi kwia atimané tikimótóró su betalepó.

²⁸ Ai ala tómó, Kótó ẹ etei kaae Tale beterapó tuẹ ini, hāle ọla nisyóló taae faraletéiné atima mo okokoi tuẹ mulóló, ené inire ala họko deté fu beterópóló taaralepó.

²⁹ Atétepa, du betale dowi ala atima tuámó fāayóló sұraletei i ape. Donoi ala ini, họko dere alakélé, so nópu nokole alakélé, ọla ọla mo dekéró senée dere alakélé, mepaae dere sonaalei dowi alakélé, hāle yó tarepó. Téturaalu, mepaae whịné mole wisi wisi ọla ó du betere alakó enée yóló dei tuẹ mutereteikélé, whị dele alakélé, họle sere alakélé, whị dilikitere alakélé, me whịpaae dei kisipa mutere alakélé, betere dokọ hāle yó tarepó.

³⁰ Tétu me whị kikiti eratere fokélé, mo hākeamó yóló sininatere fokélé, Kótó hóróló bóe dele alakélé, fo wosóló aqmó bitini, dowāae fole alakélé, nene duraalu bopé faketerere alakélé, me whịné amatei ẹ doi sóró horatere alakélé, hāle du

beterapó. Aita atimané tuénétei kae kae dowi ala kaaróo, hama alimané dere fokélé woseni dowaae fóo, duraalu dapo.

³¹ Tétu, wisi tué mutere alakélé, kisiipa tiki tiratere alakélé, yaala sókó fole alakélé, kolené sukutere alakélé, atima tuamó mo munipó.

³² Kótóné ama mo donotóro taleturaalu, atei kaae ala du betere so whita, mo ti sukópóló dae ere fo atimané tué irutei, dowi ala hãle yó tawóo, atei kaae ala du betepa mepaae whiné kilitu, ai alata mo wisirapa yae yóo du beterapó.

2

Kótóné fo tokóló mo donotóro taletere ala

¹ Atérapa, diã mepaae so whiné du betere ala taleyóló só derótu betere so whi-ó, fo tokóló taletere sukamó diã hãsóko faai kisiipa mutu, me fo tokó matere alakélé mo yaalomeipó. Ti noatepae, atima du betere ala kaae diaaokélé du betereteiné, atima só deróturaalu diãkélé ai só derótu betere ape.

² Ai ala du betere so whita, Kótóné hãle hoko taleyóló só deréni, atimané mo yale ala Kótóné mo donotóro taletu beteretei ðané kisiparapó.

³ Diã mo whiné mené dere ala taleyóló só derótu betere-a, atimané ai dere ala kaae diaaokélé du betepa, Kótóné mo donotóro taletere tuamó diãkélé hãsóko faalopóló de?

⁴ Meta, Tale ą mo wisi alatóro erótu betere Kótó bitu, diã hãsóko fóló dowi ala depa kwia hapale tokó meni yóo, diã tų wisipaae fópóló kaae taté fóo, du betere ala diã kisipani, hãle ęla kaae aqróló

faletu betere? Aṭa wisi alamaaté erótu betere Tale ereteiné, diḡ dowi ala taaróló tṭ wisiṭaae fópóló, kaae taté fu betere ala diaaḡ kisipa ini airapó?

⁵ Téṭatei diaaḡ hosaa ṭaru, dowṭaae fóló dowi ala haḡe yó tareṃó Kótó ḡ fopaae butu, kwia melaaire ala diaaḡtei beṭapaae yóló muté ai hutu betere ape. Atéró kwia matere alata, ama mo donoyóló taletere ala haḡearatere be deṃó yaalopó.

⁶ Kótóné aṣeṃó i fo erapó.

“Beṭḡ beṭḡ so whṡ atimané yale alamó Kótóné kwia mo donotóró melatepa saalopó,” erapó.

⁷ Mepaae so whṡné wisi alatóró haḡe yó taru, Kótóné ama kae ere deḡ wisinaalekélé, wisi doi muaaire alakélé, ḡtamo beṭamó betó tawaaire alakélé, senée yóló wóputu betere so whṡṭaae Kótóné mo ti betere bete melaalo ai ape.

⁸ Téretei, mepaae so whṡ kale mo fo wisi wosóló aḡmó bitini, atimatei heḡese yaaire dowi ala sya fóló, du betere so whṡtamo Kótó ḡ fopaae butu, kwia melaalo ai ape.

⁹ Atéturaalu, dowi alatóró du betere so whṡ fea dei fomaake kisipa muḡpóló, Kótóné seḡei ala folosóró Juda fake so whṡṭaae eróo, nalo ti Juda meire fakeṭaae eróo, yaalopó.

¹⁰ Téyaalotei, wisi ala du betere so whṡṭaae ti Kótóné ama kae ere deḡ wisinaalekélé, wisi doi muaaire alakélé, hosaa muni deyóló dua betere alakélé melaalopó. Ai alata, folosóró Juda fake so whṡṭaae melóló, nalo ti Juda meire fakeṭaae melaalo ai ape.

¹¹ Ti noateṭaae, Kótó ḡta me fake so whṡṭaae wisi ala eróo, me fakeṭaaemo dowi ala eróo dumi, mo

betə kaae alatóro erótua dapó.

¹² Mepaae so whi Kótóné ama tukóló muló betere fo tué inipatei, dowi ala du betepa, ti ai tukóló muló betere fo hāle mupatei, Talené atima só deróló mo ti aluraalopó. Atétere kaae, mepaae so whi fea Kótóné ama tukóló muló betere fo tué irutei, dowi ala du betepa, ti ai tukóló muló betere fonétei só deraalo ai ape.

¹³ Ti noatepae, Kótóné ama tukóló muló betere fo hāle wosetu betere so whipaae mo donoi so whipó yaalomeitei, sya fóló erótu betere so whipaae ti mo donoi so whipó enérápó.

¹⁴ I dere fota mo dapó. Juda meire fake so whipaae kale tukóló muló betere fo mené dosayóló yó meni, atima kōleaanétei ita wisi alapó, ita dowi alapóló tuépa, ti Kótóné ama tukóló muló betere foné eraaire ala atimané hosaa tuamó asēretei hākearatapó.

¹⁵ Atéturaalu, atimané me dowi ala depa, ti hosaa tuamó atimatei só deróo, me sukamó yale ala tuénétei talerālemó, me ala yale kisipa munitepa, ti atima só derénipó kisipa muóo, dua dapó. Atétere alané Kótóné i ala yae, i ala yaqse ere fo atima hosaa tuamó asēretei hākearatapó.

¹⁶ Ti ai alata, Kótóné so whi feané hosaa tuamó hiróló mole alarape taletere be demótóro Kótóné Yesu Kerisopaae tale yae depa, amamo tale yaalopó. Kale fo wisi yālo yó móturaalu me fo kae dumi, ai fotóro yó mótu beterapó.

Kótóné tukóló muló betere fo Juda fake atimanékélé tikitua dapó

17 Térapa, diã Juda fake so whi-ó, yalo i dere fo mo wosae. Diaaø kisipané diãta, Juda fake bitu, kale tukóló muló betere fopaae tué tiki tiróló, Kótótamo fulumu yóló betamó betere so whipóló bopé faketu bitu de?

18 Kale tukóló muló betere fo tuamó mo bete mole foró doasi kisipare alatamo diaaø diriyóló kisiipa sóró, Kótóné ama yaai kisiipa mole ala betekélé sumó tuéruraalu, kae kae ala fea taleyóló, mo bete alata i ape du betere?

19-20 Ti diã feata, Kótóné tukóló muló betere fo tuamó bete mole alarape fea bulapóló kisiipa mutu, kele dilikire whirape alisóró fóló tu yó melóo, diliki tuamó betere so whi demó beterópóló deróo, okokoi kisiipa mole so whi donoratere ala yóo, keteirape yó matere whi betóo erapó du bitu de?

21 Ti diãné ai yó mótu betere fo-a, diaaøkélé sya fóló du bituraalu de? Diãné mepaae so whi ma duraalu, qlémi naøse du betere-a, diækélé qlémi nukumié?

22 Diaaø mepaae so whi ma fo duraalu, nópu naøse du betere-a, diækélé nópu nukumipóló de? Diã kapala kótópaae moma yaai aleale qla hórótu betere so whi-ó du betere-a, diã momatere bemó muó mole qla qlémi sinituraalu de?

23 Diã kale tukóló muló betere fo tuérapóló bopé faketu betere so whi-ó, diaaø ai ere fotei tukóló, Kótóné doi folokoleróló dorótumié?

24 Diaaø du betere alata, ašemó i ere fo kaaepó. “Diaaø du betere alané Juda meire fake so whi tuamó Kótóné doi wisi mo ti doró beterapó,” erapó.

²⁵ Kale tukóló muló betere fo sya fóló erótu bitutamó, tiki sekaę tukóló sirótu betepa, ti bete mulapó. Téni, kale tukóló muló betere fo sya feni tikitu betepa, ti tiki sekaę tikinire whị aęrapó.

²⁶ Téretei, mepaae tiki sekaę tikinire whịné kale tukóló muló betere fotamó sya fóló erótu betepa, ti tiki sekaę tikire whịné dere ala kaae yaalo meipóló de?

²⁷ Atérapa, dią tiki sekaę tukóo, kale tukóló muló betere fokélé tuę yóo irutei, ai fo tikitu betepa, ti tiki sekaę tikinirutei kale tukóló muló betere fo sya fóló erótu betere whịrapené dią só deraalo ai ape.

²⁸ Mepaae Juda fake whị hąle tó tikiné maaté dąta, Juda fakepó du betepa, ti ai whị ą mo Juda fake whị meipó. Ti mo tó tiki sekaę tikitu betere alata, me bete munipó.

²⁹ Mepaae whị detamó ama hosaa tuąmó Juda whị betepa, ti ą mo Juda whị ai ape. Asemó ere fo maaté sya fóló mo siriró betepa, aita bete ala meipó. Dęi Kepe Wisiné hosaa tuąmó siriró betere whịta, mo siri eró beterapó. Atei kaae whị doi sóró horatere alata mo whịné dumi, kótóné betą ą sóró horótu beterapó. Kótóné betą ą sóró horótu beterapó.

3

Mepaae alané Kótóné eró tare wisi ala aluranénipó

¹ Térapa, Juda fake kolósu, Juda meire fake kolósu depa, noa wisi alané Juda meire teraae fale? Ó

atima tiki sekaę tikitere ala tuamó noa ke wisikó bule?

² Aita mo kae kae ala fea atimapaee meló betereteiné teraae falapó. Ti folosóro meló betere topo ala i ape. Kótóné mo ama fotóro atimapaee wisiyóló kaae tawae yóló, melóló atima sóro beteralepó.

³ Ti mepaae Juda fake so whi ąpaee tuę tiki tirénitere betené noa ala yaaloé? Ai dere alané Kótóné ama so whipaae eró tare wisi ala doróló aluranére?

⁴ Mo meipó. So whi feané dere ala taletepa, kapala fo bupatei, Kótó ą betą mo fotóro bulapó. Aita, ašemó i ere fo kaaepó.

“Naao dere fokélé mo donotóro yóo,
fo tokóló taletere alakélé, naao kisipa mole ala
sya furaalu mo donotóro dapó yóo, yópóló
yae,” erapó.

⁵ Dąné hoko du betere dowi alané Kótóné mo donoi ala so whiné kolópóló hakearatepa, dąné noa fo enére? Dąné du betere alamó Kótó ą fopaae buturaalu kwia matepa, hoko ala dapó yaaloé? Ti atei kaae mutere tuęta, mo whiné mole tuępóló i dere ape.

⁶ Kótó ąta, hoko ala dumipó. Atei kaae ala wuasóro, ti i haemó betó mole so whi featamo netéró fo tokóló tale uąé?

⁷ Mepaae so ó whiné etei kaae fo enérapó. “Yąlo kapala ala du betepa, ti Kótóné ama bete mole alaró mo kae ere dę wisinaaletamo hakearóló, mo ti fakerótu beterapó. Atétu betepatei, noatepamo Kótóné ę dowi ala dere whipóló, só derótu betere?” enérapó.

⁸ I dere fotamo mopa, ti etei kaae fo enérápó. “Wisi ala sókó wópóló, dą dowi ala dekéró yaalopa sae!” Dąné atei kaae hoko fo du beterapóló, mepaae so whinė dą doi doróló erótu beterapó. Mepaae whinėkélé atei fo deté fupa wosalepó. Talené atei kaae so whi só derótu betere alata, mo donopó.

Donoi whi mo betąkélé bitinipó

⁹ Térapa, atei kaae dere forape woseturaalu, dą noa kisi pa munére? Kótóné dą Juda fake wisiyóló kilituraalu, Juda meire fake siwiyóló tao sumipóló kisi pa mute? Ai ala mo dumipó. Dą Juda fakekélé, Juda meire fakekélé, fea betą alatóró ereteiné dowi alané dokóló muló beterapó.

¹⁰ Aita, asemó ere fo kaaepó.

“Donoi ala dere whi mo betąkókélé bitinipó.

¹¹ Mo betą whinėkélé etei kaae Kótó beterapó kisi pa muóo, mo betą whinėkélé Kótó kelaai dapóló ketekę buóló kekóo, mo dumipó.

¹² So whi mo fea tų wisi taaróló kópaae fóló, atima feané du betere ala bete muni, mo ti doyo falapó.

Wisi ala dere whi mo betąkókélé bitinipó. Mo meipó,”

¹³ “Atimané du betere fota, whi dou tukętepa dei kęlaa sókó woutere kaae yóo, atimané dere fokélé whi dilikóló kapala fotóró yóo, atimané kólómó du betere fokélé, whi tukó nóló sukunatere dowi fę bole wuliné whi dóló sukunótu dere kaae, yóo du beterapó,”

14 “Atimané me whi yóló sininóló só deratere foró, whi hakesaaratere fotamo atima tuámó fāanuraalu, hāle yótóró tarapó,”

15-17 “Atima whi daai keteke buóló kekepatamo furaalu, bekélé, ɔla ɔlakélé fea doróo, so whikélé susupuróo yóló fi tikimó, nalo wale whiné atima kaketu betepa kelaalo ai ape. Atéturaalu, hosaa muni deyóló mo dua betere ala atima mo kisipanipó.”

18 “Ai so whi atimané du betere alamó, Kótóné kwia melaalopóló witere alakélé mo dumipó,” erapó.

19 Kale tukóló muló betere fota, hāle whirapepaae dumitei, ai fo aqomó sukóló betere so whipaae dapóló kisipa mutapó. Atére betené i haemó betó mole so whi feané yale ala betakélé hāsókó feni, mo donotóró taletere sukamó, dāné yale dowi alamó dapaae wosetepa, me fokó hiréni, mo dono dapó fo betā enérápó. Téturaalu, mo betā whinékelé atei ala inipóló, Kótópaae me tokó matere fokélé mo enénipó.

20 Atéreteiné Kótóné mo betā whipaaekélé, yāta kale tukóló muló betere fo wisiyóló erótu betaletiné donoi ala du betale whipó fo mo yaalomeipó. Ti ai tukóló muló betere fonéta, dā fea dowi ala dere so whitóró beterapó kisipa muópóló, dapaae hākearóló yó mótu beterapó.

Tuē tiki tiratere alané donoi so whi beteratapó

21 Tépatēi, Kótóné tukóló muló betere fo mupatei, mió ama so whi donoratere ala hākearó betepa kelerapó. Ai ala yaalopóló, kale tukóló muló betere foró kóló whirapetamoné ašemó erapó.

22-24 Ti Juda fake ó kae fakekéle me ala kae inipó. Dá fea dowi ala yó tareteiné Kótóné ama ere de wisinaale mo yaɣarapó. Atépatei, dá fea Kótóné hamokoróló hãle tao sere alané donoi so whi beteralepó. Ai tao sere alata, Yesu Kerisoné ama betere bete melóló, dá dupuró beteralepó.

25 Ti Kótóné Yesu sukópóló meló betere alata, so whitamó fopaae bole ala kemeróturaalu erapó. A atéró sukãle ala mopóló tué tiki tiratere so whitamó Kótóné fopaae butere ala momó kae yaqsóro, mo ti kemeró beteralepó. Ai ala ereteita hãle mei, ama donoi ala so whi feané kolópóló, hãkearóturaalu yalepó. Ti noatepae, take bitiré wale so whiné du betale dowi alamó, kwia hapale tokó meni, dua kaae taté fu betalepó.

26 Ama ai ala yaleteita, mió i alimó betere so whiné ama donoyóló taletere ala kilitu, a mo donoi Tale betóo, Yesupaae kisipa tiratere so whi donoratere Tale betóo ere ala kisipa yópóló hãkearalepó.

27 Térapa, so whi feané hãle bopé fake dere alata, noa wisi ala yale tikimó bopé fake yaaloé? Noa ala sya feleteiné bopé faketera ala hepée faraleé? Aita, Kótóné tukóló muló betere fo sya fele alané ini, Kótópaae betã tué tiki tiraletiné yalepó.

28 Ti noatepae, dané kutirimó muló bitu eró tare mo bete mole ala betã i ape. Kótóné mepaae so whipaae diã donoi so whipó dere fota, kale tukóló muló betere fo sya fóló erótu beteremó dumipó. Tétumitei, Kótó apaae kisipa tiki tiratere alamó betã dapaae mo donoi so whipó enérapó.

29 Ti Kótóta, Juda fake so whi maaté teteróló kaae

taru, Juda meire fake so whi kaae tanipóló kisipa mute? Meipó. Aṭa, Juda meire fake so whikélé fea teteróló kaae tare Kótó beterapó.

³⁰ Ti noatepae, tiki sekaṣ tikire whiró tikinire whitamó wusuró betá kaae tuṣ tiki tiró betepa kilitu, atima fea ama so whi beterópóló, ai betá Kótónétóró donoróló, beterótu beterapó.

³¹ Tuṣ tiki tirae yóló ḁané yó mótu betere foné Kótóné tukóló muló betere fo bete munire ɔla aqrótu betere? Mo meipó. Ti ai tukóló muló betere fokélé mo bete mulapóló, ḁané du beterapó.

4

Abraham kisipa tiró betepa donoi whipó erapó

¹ I yale fomó, ḁa Juda fakené noutere Abraham-paae Kótóné noa ala eratepa ama kolóló kisipa salepóló ḁané noa fo yaaloé?

² Motamo Abraham-né du betale wisi ala kolóló, Kótóné apaae mo donoi whipó uasóró, ti a bopé faketerere ala uapó. Tépatēi, whi betanékelé Kótóné keletómó bopé fake dere ala mo enénipó.

³ Ti *buk*-mó noa fo aseyóló muló betere?
 “Kótóné Abraham-paae i ala eraalopóló mulale fo wosóló, ama mopóló tuṣ tiki tirale ala Kótóné kilituraalu, apaae me alakélé muni, mo donoi whipó” erapó.

⁴ Betá whi mené kutó dirateremó matere duputa, kɔleyóló hɔle mótumitei, ama diale kutómó matapó.

⁵ Ti mo whinéta ai ala dua deretei, me whiné apaae mo donoi whipó yópóló kisipa mutu, me wisi ala ini, dowi ala dere so whi donoratere

Kótópaae tué tiki tiratere kilitu, ai whiné ama dowi ala kwia tokóló aluróló, mo donoi whípó dua dapó.

⁶ I dere fo kaae, Depit-nékélé asęrapó. Me whiné ama ditere kutó kolóló dumi, Kótóné mo donoi whípó dere fo wosetu, ą hainé sukutu beterapó. Ai ere fo i ape.

⁷ “Mepaae whiné Kótóné fo tikitu beteremó, melaai yale kwia hąle kemeróo, atimané mepaae dowi alakélé Talené ama husuróo, ere whırapeta, mo hainé sukutu beterapó.

⁸ Mepaae whiné ama yale dowi alamó Talené kwia mo melókéle yaalomeipó, dere fo wosetere whı ą hainé sukutu beterapó,” erapó.

⁹ Mepaae whı Talené wisiralepóló hainé sukutere alata, tiki sekaę tikire whıpaae maaté eróturaalu, tikinire whıpaae eranénipóló kisipa mute? Mo meipó. Ai fake tamo wusurópaae betą kaae alatóró eraalo ai ape. Ti dąné noa fo yó maté waleé? Abraham-né Talepaae tué tiki tiratapa kilituraalu, ąpaae me alakélé muni, mo donoi whípó yalepó.

¹⁰ ąpaae ai fo eretei-a, tiki sekaę tikire whı betepa yalepé, tikaai hąle betepa yaleé? Aita, tiki sekaę tukóló betepa ini, tikaaiapa yalepó.

¹¹ Mo take Abraham ą tiki sekaę tikaaiapatei, Kótópaae tué tiki tiró betere kilitu, ąpaae mo donoi whípó erapó. Até itikimó, nalo ama tiki sekaę tukóló sirirélipakalepó. Aita, ą mo donoi whípó ere fo mo erapó yópóló, dąle muló beterapó. Abraham ą ai ala ereteiné mepaae tiki sekaę tikinirutei Kótópaae tué tiki tiró betere so whiné aya beterapó. ą atéreteita hąle meipó. Atimané tué tiki tiró

betere ala Kótóné kilitu, mo donoi so whípó yópóló erapó.

¹² Ti Abraham ąta, tiki sekaę tikire whırapené ayakélé beterapó. Ai ala maaté mei, ą tiki sekaę tikaaipatei, tuę tiki tirale ala sya fu betere so whıné ayakélé beterapó.

¹³ Kótóné Abraham-paae duraalu, “Yaró naao naalené deté faaire naaletamomó i hae tiki mo turó melaalopóló,” yóló munélipakalepó. Ai alata, Kótóné tukóló mulale fo sya fóló eraleteiné sini, Talepaae tuę tiki tiratepa donoi whípó yale alané salepó.

¹⁴ Ti noatepae, tukóló muló betere fopaae kisipa tiratere so whıné ama eraalopó yóló mulale ọlatamo supa, ti tuę tiki tiratere ala ke buni yóo, Talené ama eraalopó yóló muló betere fokélé bete muni yóo, ere aęratapó.

¹⁵ Ti noatepae, mepaae so whıné kale tukóló muló betere fo sya fu bitutei, tukóló dowi ala depa, Kótó ą fopaae buturaalu, kwia mótua dapó. Ai tukóló muló betere fo kisipa inire whırapené ai fo tikitepa, ti kale fo tikitapó fo dumipó.

¹⁶ Atérapa, Kótóné ama eraalopó yóló mulale fo dokonóló eratere alata, Kótó ąpaae kisipa tiratere so whıné ama hamokoróló hąle tao sere ala sópóló mótua dapó. Ti ama eraalopó yóló mulale fo dokonóturaalu, Abraham-né deté faaire naale senaalepaae erópóló yalepó. Ti Abraham-né naale senaaleta de maaté? Aita, kale tukóló muló betere fo kaae tawae yóló, melale fakepaae maaté eraalomeitei, Abraham-né tuę tiki tirale ala sya fu betere so whıpaaekélé eraalopó. Ti ąta, ąa tuę tiki tiró betere so whıné ayapó.

17 Aita, i asere fo kaaepó. “Yalo ya haemó betóló fale kae kae tiki daae mole so whi feané aya beter-atapó,” Ti ata, ama kisipa tirale Kótóné keletómó dāné aya beterapó. Ai Kótóta, sukale so whi momó kepaaróo, me ala yaai teópatei, mo erapó dere Tale betóo erapó.

18 Kótóné Abraham-paae eraalopó yale ala er-aaire aqpa meitei, mo eraalopóló Talepaae kisipa tiki tiraletéiné, kae kae tiki daale so whiné aya alée felepó. Ti ai alata, Talené apaae duraalu, “Ó sapaae kese horóló hore dosayae. Naao deté faaire naale senaaleta, ai ere ala kaaetóró yaalopó,” yale fo mo dokonalepó.

19-20 Abraham a 100 ba fo betóló kemeyaletéiné mo ti otere yóo, soma Serakélé sere yóo erepó. Atéru, naale senaaale deyaaire fotokó mo buni, atimaamo otereró seretamo betere ala diriýóló tuépatei, Talené apaae eraalopó yale fo mo er-aalopé neyqalorópóló býóló haepaae derepéni, mo eraalopóló keteke buóló tué tiki mo ti tiró bitu, Kótóné doi hale horótu betalepó.

21 Aita hāle mei, Kótóné eraalopó yóló mulale fo ama fotokóné mo sumó eranérápóló kisipa mutu, ama tué tiki tiratere ala mo ti fotokó bualepó.

22 Atéreteiné Kótóné apaae “Ya mo donoi whi aleróló beteratapó,” erapó.

23-24 Atéró donoi whipó ere fota, Abraham a maaté tao sóró wisirótu initei, dā nalo betaaire so whikélé wisirótu erapó. Dā teteróló kaae tare whi Yesu a mo ti sukaletei, momó kepaaróló beteralé Kótópaae dā feané tué tiki tiratēpa, ti dapaaekélé donoi so whipó yaalo ai ape.

25 Ti dāné dowi ala tokóló aluraai Kótóné naalema dópóló melóo, dā me dowi alakélé muni, mo donoi so whípó yaairaalu, ą momó kepaaróló beteróo erapó.

5

Hosaa muni deyóló hajné sukqaire ala

¹ Atéreteiné dā Yesu Kerisopaae tuę tiki tiró betepa, Kótóné dāpaae me alakélé muni, mo donoi so whípó erapó. Atérené mió dā teteróló kaae tare whi Yesu Kerisoné yale alané dāró Kótótamo bóe du betaletei kemeróló, hosaa muni deyóló dua beterapó.

² Dā Yesupaae tuę tiki tiró betepa, Kótóné hamokoróló hāle tao sere ala dāpaae erópóló, ama dā dapesó fóló, ai ala tuámó sóró beteró beterapó. Tépa, dā Kótóné ama kae ere dę wisinaale tuámó betaalopóló kisiapa mutu, mo kée yóló hajtamo kaae tawóló i betere ape.

³ Nalo dāpaae ai eraaitere ala maaté kelaai dumi, mió dāpaae i erótu betere sekei ala tuámó bitukélé, mo kée yóló hajtu beterapó. Ti ai sekei alané dā haepaae só deréni, hāle beletétóro fu betere alanétei hajtere ala kaarótu beterapó.

⁴ Atétere alané Talené ala eratere whi wisi beterótu beterapó. Atéró whi wisi bitu, take nalopaae Kótóné wisi ala eratepa kelaalopóló, dere haj kaaratapó.

⁵ Take nalopaae wisi ala kelaalopóló hajtamo kaae taté fu betaletei, sinipóló fomo kisiapa muaalo meipó. Ti noatepae, Kótóné ama yaala sókó fole ala dāné hosaa tuāpaae tepeyóló fāanalepó.

Kótóné ama ai yaala sókó fole ala dāné tué dere teita, ama dāmó melale Dēi Kepe Wisiné eralepó.

⁶ I dere fo wosae. Dā Kótó tuéniru, dowi ala du betere so whi me ala yaaire fotokọ bunipa, dā tao saairaalu mo dono be dēmótóró Yesu Keriso sukālepó.

⁷ Mepaae whi de mo donoi whi tao saai dapóló sukutere ala suka fea yó tani, betā betā sukamó maaté depa keletapó. Atétere kaae, mo donoi whi wisinaale tao saai dapóló, mepaae whi sukāairetei mo hapólurapó.

⁸ Tépatei, Kótóné ama dāpaae yaala sókó fole ala etéro hākearóló yó matapó. Dāné dowi ala hāle yó tapa, ai yó tare dowi ala tokóló aluraairaalu, Yesu Keriso sukālepó.

⁹ A sukuturaalu, sókó fele sameané dā donoi so whi beteró betereteiné take nalo Kótó ẹ fopaae butu matere kwia dāné saqsóró, ama tao saaire ala yaalomeipóló de? Mo tao senérapó.

¹⁰ Take dāta Kótóné ama bóe whi beteretei, ama naalema sukuturaalu bóe firóló, betāmó beteró beterapó. Mió ẹ kepaayóló betereteiné dākélé mo ti beterópóló, ama ai eró betere alané mo yaalomeipóló de?

¹¹ I fota, take nalo yaaire alamó maaté dumitei, mió dā teteróló kaae tare whi Yesu Kerisoné yale alané dāró Kótótamo bóe fiyóló, betāmó bitu, mo kée yóló hājné sukutu beterapó.

Adam-né ere ala tuqmó sukọ, Yesuné ere tuqmó kepaayóo erapó

¹² Térapa, betā whiné yale alané i haepaae dowi ala wópóló tų tukiyalepó. Atéyale dowi alané

sukutere ala kaaróló, so whi fea sukuté fu betalepó. Ti noatepae, so whi fea dowi alatóró du betaleteinépó.

¹³ Kale tukóló muló betere fo sókó waaí teópa, ti dowi alapi i haemó moipakalepó. Ai tukóló muló betere fo sókó waaipa, so whiné du betere dowi ala Kótóné fea taleyóló dosāanipó.

¹⁴ Atépatei, Adam betale alimó kaae sóró so whi sukuté wóló, Moses betale alimó betere so whikélé fea sukutere alané teteróló kaae taru, hāle sukutétóró fu betalepó. Ti Kótóné yóló mulale fo Adam-né tukóló ere dowi ala kaae, ai so whiné initei, atimakélé mepaae dowi ala hāle deté fu betepa, sukutétóró fu betalepó. Ti Adam-né yale alata, nalo waaire whi betāné yaaire alatóró sūróló erapó.

¹⁵ Tépatēi, Talenē hāle matere ala kolósu, ama fo tukóló yale dowi ala kolósu depa, mo betā kaae meipó. Téyaletēi, Kótóné hamokoróló tao sere alaró betā whi Yesu Kerisoné hamokoróló hāle matere wisi alatamo, so whi feapaae mo turó sūralepó. Atéyale alané folosóró yale ala mo teraae falapó.

¹⁶ Kale yale fo momó dapó. Kótóné hāle matepa sere alaró betā whiné yale dowi alamó sere sekēi alatamo betā kaae meipó. Betā whiné yale dowi alamóteí, so whi fea taleyóló só deralepó. Atépatei, so whi feané fo tukóló yale dowi ala mo dekéró yó tapa, Kótóné hāle matere alané so whi feapaae diā me alakélé muni, mo donoi so whipóló beteró beterapó.

¹⁷ Ti noatepae, betā whiné fo tukóló yale alamó sukutere ala ai whi tuāmó sókó walepó.

Atéyaleteiné so whị feapaae sukutere ala tokó melóló, ai alané so whị fea tẹteróló kaae tarepó. Kótóné hamokoróló tao sere alaró hẹle matere donoi doitamo sere so whịta, ti betẹ whị Yesu Keriso tuámó mo ti betere bete sóró tẹteróló kaae taté fu betaalopó. Atétu sukutere alané tẹteróló kaae taretei, mo ti bosenée falapó.

¹⁸ Atére betené betẹ whịné fo tukóló yale dowi alamó kwia móturaalu, so whị fea só deró beterapó. Atépatei, me whịné ti fo wosóló mo betẹ donoi ala wisinaale ereteiné so whị feapaae me ala muni, mo donoi so whípóló, mo ti betere bete mótu beterapó.

¹⁹ Ti noatepae, kale yaọse yóló mulale fo betẹ whịné tukóló yale dowi alamó, so whị fea dowi ala yale whítóró alée felepó. Atére kaae, betẹ whịné fo wosóló sya fele alané so whị fea me alakélé muni, mo donoi so whị beteraalopó.

²⁰ Kale fo tukóló du betale dowi ala mo ti fakeyópóló, Talené ama mepaae folosóró melale fotamo touróló, kale tukóló muló betere fokélé melalepó. Téyalemó, dowi ala mo ti faketepa, ai ala aluraai Kótóné hẹle hamokoróló tao sere alakélé mo ti fakeralepó.

²¹ Aita hẹle meipó. So whị fea dowi alané tẹteróló kaae tapa sukuté fu yale kaae, mió dẹ tẹteróló kaae tare whị Yesu Keriso tuámó betepa, Kótóné hamokoróló hẹle tao sere alané tẹteróló kaae taru, dapaae me alakélé muni, mo donoi so whípóló, mo ti betere bete mótu betaai erapó.

6

Dẹ dowi alamó sukóló, Yesu tuąmo momó

kepaayóló beterapó

¹ Térapa, mió dāné noa fo yaaloé? Kótóné ama hamokoróló hāle tao sere ala mo ti fake yópólópa, dā dowi ala hāle yó tawae fo enére?

² Ai fo mo enénipó. Ti taketa dā dowi ala tuamó mo sukóló molepó. Atéreteiné ai ala tuamó dā momó kae netéró bitiré faaloé?

³ Ti dā fea wēi tópuale alata, Yesu Keriso tuapaae doropóló, ą sukāle ala tuamó tópualepóló kisipa mutumié?

⁴ Ti dā atéró wēi tópuale alata, ątamo betamó sukóló ą tuamó douralepó. Ti hāle meipó. Alimané mo kae ere dę wisinaale tuamó bole fotokóné Yesu Keriso kepaarótu yale kaae, dākélé kisi betere bete sóró ątamo betamó bitiré faairaalu yalepó.

⁵ Ti Yesu sukutu yale kaae dākélé, ątamo sukutepa ti ą momó kepaatu yale kaae, dā feakélé kepaayóló betaalopó.

⁶ Ti noatepae, ai upulé ala du betale whīta, ątamo filipaa ni tómó oleróló daletei dāné kisi-parapó. Atéyale beteta, dowi alané dā momó tęteróló kaae tawaqsóró, tó tikiné dowi ala yaai bole fotokọ kemerópóló, ątamo sukālepó.

⁷ Ti noatepae, mepaae sukutere whī ti dowi alané momó kae dokóló muni, teraae fóló hāle beterapó.

⁸ Ti mió dā Yesu Kerisotamo betamó sukunapóló kisipa mutepa, ti ątamo betamó betaalopóló kisipa tiki tiró beterapó.

⁹ Ti noatepae, Yesu Keriso ą sukóló kepaayóló beteretei, momó kae sukāalomeipó. Sukutere

alané ʔ tɛtɛróló kaae tawaaire sɔnɪre ala ɖané kisiparapó.

¹⁰ ʔ sukɔ́lɛ beteta, dowi alamó ʔpaae erótu be-tale sekɛi ala mo ti kemeraairaalu, betɔ́ félitóró sukɔ́lɛtɛi ʔ momó kae sukɔ́alomeipó. Atéró mió ʔ betereiteita, Kótóné ala eraairaalu, beteraipó.

¹¹ ʔ atétu yale kaae, dowi alané ɖiɔ́ tɛtɛróló kaae tawaletɛi, mo ti kemeróló ɖiɔ́kélɛ sukó, Yesu Keriso tuɔ́mó bituraalu, Kótótamo mo betámó betóo, erapóló kutirimó muló betae.

¹² Térapa, diaaɔ́ mo tó tikiné ekɛleyóló yae dere ala sya furaalu, du betere dowi alané ɖiɔ́ tɛtɛróló kaae tawaɔ́sóró yae.

¹³ Diaaɔ́ hó naase, ó tiki fea, tó tikiné ekɛleyóló du betere dowi alapaee mulaɔ́se. Ti ɖiɔ́ta, mo sukɔ́lɛ whɛtɛi momó kepaayóló beteraɔ́pa, betɔ́ whɛné ama fosói tɔ́ ó sepake me whɛné kutó ɖiyópóló mótu dere kaae, Kótóné ama eraai kisipa mole donoi ala wisinaale erópóló, diaaɔ́ hó naase, ó tikikélɛ mo turó Kótópaae melae.

¹⁴ Ti mióta, ɖiɔ́ kale tukóló muló betere foné tɛtɛróló kaae tare aɔ́mó bitini, Kótóné hɔ́lɛ hamokoróló tao sere alané tɛtɛróló kaae tare aɔ́mó beteraipó. Téreteiné dowi alané ɖiɔ́ momó kae tɛtɛróló kaae tanénipó.

Take dowi alané wae sóró betereitei, mió donoi alané kutó diratere whi beteraipó

¹⁵ Térapa, mió ɖané noa fo yaaloé? ɖɔ́ta, kale tukóló muló betere foné kaae tare aɔ́mó bitini, Kótóné hamokoróló hɔ́lɛ tao sere alané kaae tare aɔ́mó beteraɔ́pa, dowi alatóró deté fu betaalopó fo enére? Mo meipó.

¹⁶ Yə me tɛtɛrɔ́ló kaae tare whɪ beterepaae fóló, ama dirae dere kutó naao dirótu betepa, ti yə ai whɪné wae sóró kutó diratere whɪ beterepóló kisipa muae. Yətamo dowi alané wae sóró kutó diratere whɪ betepa, ti ai alatóró deté fóló, sukutere alapaae sókó faalopó. Yətamo Talené fo aqómó bitu, ai mo ala wisi sya fóló erótu betepa, ti donoi ala dere whɪ betaalopó.

¹⁷ Take diə dowi alané tɛtɛrɔ́ló kaae tapa, ai dowi alané kutó deratere so whɪ betalepó. Atépa, diəpaae kale fo wisi yó móturaalu, i fonéta diə kaae tawaalopa, aqómó betae yóló yó maletei diəné wosalepó. Ai fo wisi diaaə hosaa tuəmə muló bitu, ketekə buóló erótu betereiteimó yəlo Kótópaae mo kée enérápó.

¹⁸ Taketa, diə dowi alané dokóló muló betereitei, teraae faróló mió donoi alané wae sóró kutó diratere so whɪ ai betere ape.

¹⁹ Diə mo i hae whɪ bituraalu, yəlo i yó mótu betere mo bete mole fo wisi diə diriyóló tuə yaaire sɔ̀nɪreiteiné kisipa yaasepóló, mo whɪné dere alapaae dó faróló i dapa wosae. Taketa, diəné hó naase dowi alapaae mulóló, ai alané wae sóró kutó diratere so whɪ bitu, dowi alatóró mo ti fakeraté fu betalepó. Atétu yale kaae, mió diəné hó naase ó tiki fea Kótópaae həle menóló, ama donoi alané wae sóró kutó diratere so whɪ betae. Atétepa, ti Kótóné mo kae so whɪ beteraté fenérápó.

²⁰ Take diə dowi alané wae sóró kutó dirótu betale sukamó, donoi alané tɛtɛrɔ́ló kaae tare tuəmə bitipó.

²¹ Mió i betere alimó haleturaalu, take diəné du betale ala kisipa fatepa, take yale ala tuəmə me

noa wisi alakó bupa kelere? Take ai deté wale alané duputa, ti sukutere ala kaaró ai betere ape.

²² Taketa, dowi alané diá dokóló muló beteretei teraae faróló, mió Kótóné ama kutó dirópóló wae sóró betero betere so whi beterapó. Atéro Kótóné ama kae ere wisi ala tuámó bitiré fole duta, mo ti betó tawaaire bete sóró betaalopó.

²³ Ti noatepae, dowi alané ama kutó diratere so whipaae matere duputa, sukutere alapó. Tépatéi, dá teteróló kaae tare whi Yesu Keriso tuámó betepa, Kótóné mo ti betó tawaaire bete hamokoróló hãle mótu beterapó.

7

So whitamó dokóló betere alapaae dó faróló dere fo

¹ Norape-ó, yãlo i dere fota, Kótóné tukóló muló betere fo kisipare whirapepaae dapó. Whi sukuni betepa, ti kale tukóló muló betere foné teteróló kaae tare aomó beterapó ere fo diaaø kisiparapó.

² Betã suróló dere fo i ape. Whiné dokore so ama oma sukuni hãle betepa, me whitamó dokaairetei fo mulapó. Ama omatamo sukóló wulia berteremó, me whiné dokotepa ti fo munipó.

³ Whiné dokore sotamo oma betepatei taaróló whi me kaetamo fupa, so whi feané ai so nópu nukulapó dua dapó. Tépatéi, oma sukitikimó wulia me whitamó dokotepa, ti nópu nokole sopó enénipó. Ti noatepae, whiné dokore ala kemeyalepó.

⁴ Térãpa norape-ó, soró whitamó dokoterepaae dó faróló yale fo bete i ape. Dã Yesu Keriso tuámó

betepa, ɔ mo ti dóló sukunóturaalu, ɔakélé ɔtamo sukɔlepó. Ti aita hɔle meipó. Folosóró kale tukóló muló betere foné dokaletɛi mo ti kemeróló, sukóló momó kepaayóló betere whíné ɔɔ dokóló, nɛ du wisi oletu dere kaae, ɔɔ tuámó wisi ala epa kilituraalu, Kótóné ama doi doasi mulópóló erapó.

⁵ Take ɔɔ tó tikiné tɛteróló kaae tawale alimó, kale tukóló muló betere fonétei tó tikiné ekɛletere ala mo ti fakeyópóló, sesemeralepó. Atéró sesemeratepa du betale alané ɔɔ tuɔpaae olerale duta, ti sukutere alapó.

⁶ Take tukóló muló betere foné ɔɔ dokóló bitu, Talené ala eróturaalu, kale aseýóló muló betere fo maaté sya fóló erótu betalepó. Take até dua yale alata, ɔɔ sukuturaalu mo ti kemeralepó. Mió kisi alata, ti Dɛi Kepe Wisiné ɔɔ fotokɔ bulatepa, Talené ama ala erótu beterapó.

Dowi alané ɔɔ só deraai wóputu betere ala

⁷ Térapa, mió ɔɔané noa fo yaaloé? Kale tukóló muló betere fo-a, dowi alapó enére? Mo meipó. Ai tukóló muló betere foné ɛpaae dowi ala i ape yóló yó melóluɔameisóró, ti dowi ala kisipa uɔameipó. Ti tukóló muló betere foné mené ɔla senée yóló au naɔse fo uɔameisóró, ti au nokoletɛi dowi alapóló tué muɔameipó.

⁸ Ti ai tukóló muló betere foné tɛ mulatepa, dowi ala ɛ tuɔpaae sókó wóló, kae kae wisi wisi ɔla senée yóló au nokole ala kaaralepó. Ai fo sókó waaipa, ti dowi ala sukóló mulu, so whɔpaae me ala eraaire fotokɔ mo bunipó.

⁹ Kale tukóló muló betere fo sókó waaipa, ɛ mo beterepó. Tépatɛi, kale yaɔse yóló muló betere

fo sókó wóló, dowi ala sukóló mupatei, kepaaróló beteraleteiné ẹ dóló sukunalepó.

¹⁰ Kale yaqse yóló muló betere foné mo ti betere bete melaalo nisi yalemó, sukutere alatei ẹpaae eralepó.

¹¹ Kale yaqse yóló muló betere foné mulale temó dowi ala ẹ tuapaae sókó wóló, fotei dowi alané nópulu kaae tao sóró ẹ dilikóló dolóló sukunalepó.

¹² Atérené kale tukóló muló betere fota, me dowi alatamo hoseké ini yóo, kale yaqse ó yae ere fokélé doni, mo donoi ala wisipóló Kótóné ama kae tukóló mulóo erapó.

¹³ Ti kale tukóló muló betere fo wisi-a, sukutere ala alée fóló ẹ dóló sukunaleé? Mo meipó. Ténitei, dowi ala yalo tuẹ yópóló, dowi alané kale wisi tao sóró, ẹ tuamó sukutere ala kaaralepó. Atétu dowi alata, mo dowi ọlapóló so whiné kisipa yópóló, kale yaqse yóló muló betere foné hakearatapó.

¹⁴ Kale tukóló muló betere fota, Kótó ẹ mo kepetóró bituraalu, amatei tukóló muló beterapóló, ẹné kisiparapó. Tépateti, ẹ mo hae whi betereteiné dowi alané wae sóró kutó diratere whi i betero betere ape.

¹⁵ Yalo du betere ala yalotei kisipanipó. Ti noatepae, enére wisi alamo yalo dumí, yaalo hore alatei hoko du beterapó.

¹⁶ Ti yaalo hore ala yalo du betereteiné kale tukóló muló betere fo kolósu, yalo du betere ala kolósu depa, mo wisirapóló kisipa mutapó.

¹⁷ Ti ai alata, yalotei kekeme nóló dumí, dowi ala ẹ tuamó moleteiné du beterapó.

¹⁸ Atéru, wisi ala mo betakélé ẹ tuamó munipóló kisipa mutapó. Wisi ala ẹ tuamó munipó dere

fota, yało mo tó tikimó wisi ala munipóló dapó. Ti noatepae, yało kisipané wisi ala enépatei, yaaire mo sunipó.

¹⁹ Yało yaai kisipa mole wisi alamó dumi, yaalo hóre dowi alatei yało hałe yó tarapó.

²⁰ Téturaalu, yaalo hóre alatei du betepa, ti yało kekeme nóló dumi, ę tuámó mole dowi alané du beterapó.

²¹ Ti yało du betere ala tuámó i ala epa kolóló kisiparapó. Yało wisi ala yaai kisipa mutere sukamó, dowi alakélé ę tuámó mupa kelerapó.

²² Ti noatepae, Kótóné tukóló muló betere fo kil-ituraalu, yało tuę tiki tuámó mo kée yóló hekesetu beterapó.

²³ Atépatei, yało hó naase, tiki tuámó dowi alané ama kisipa mole ala erótu betepa kelerapó. Ai alané yało tuę tiki tuámó donoí alatamo bóe du beterapó. Atéturaalu, yało hó naase, tiki tuámó yó tare dowi alané ę dokóló *dipula* kaae, beteró beterapó.

²⁴ Yało tikita, dowi alané i turukée fole ape! Yało mo tó tikiné ę sukutere alapaae şiyóló só foleteti, né tao saaloé?

²⁵ Ti da teteróló kaae tare whi Yesu Keriso tuámó bitu, Kótóné epaae erótu betere alamó mo kée du beterapó.

Atétu betepatei, yało tuę tiki tuámó ti ę Kótóné tukóló muló betere foné wae sóró kutó diratere whi betóo, tó tikita ti yało yó tare dowi alané wae sóró kutó diratere whi betóo erapó.

8

Dei Kepe Wisiné mo ti betere bete mótu beterapó

¹ Térapa, mió Yesu Keriso tuámó betere so whì Kótóné fo tokóló só deratere ala mo yaalomeipó.

² Ti noatepae, dowi alaró sukutere alatamo fotokóné ẹ dokó muló beterepó. Atéretei, Yesu Keriso tuámó betepa, mo ti betere bete matere Dẹi Kepe Wisi fotokóné ẹ teraae faróló, hãle beterialepó.

³ Ti noatepae, kale tukóló muló betere foné dą tao saai yaletei, mo tó tikiné dere ala tuámó betereteiné tao saaire sụnipó. Atépa, Kótóné ama naalematóró dowi ala du betale whì aqyóló sukópóló doteyalepó. Aita hãle mei, so whìné yale dowi alamó melaai yale kwia tokóló aluraai yalepó. Ẹ atéró sukuturaalu, tó tikimó mole dowi ala ama só deróo, ai dowi alamó melaai yale kwiakélé ama tikimótei sóró aluróo yalepó.

⁴ Atéró só deraletei hãle meipó. Tó tikiné yae dere ala sya feni, Dẹi Kepe Wisiné yae dere ala sya fu betere so whì dą tuapaae kale tukóló muló betere foné eraai du betale donoai ala eróló mo sụnópóló yalepó. Ai ala eró betere so whì dąta, ti dąné tó tikiné yae dere ala dumi, Dẹi Kepe Wisiné yae dere alatóró du beterapó.

⁵ Tó tikiné yae dere alatóró sya fu betere so whì atimané kisipa tikikélé, ti tó tikiné hẹkesere alapaadetóró muló beterapó. Tépateti, Dẹi Kepe Wisiné yae dere ala du betere so whì atimané tuẹ tikikélé, ti Dẹi Kepené yaai hẹkesere alapaadetóró muló beterapó.

⁶ Tó tikiné yaaitere ala maaté kisipa mutu betere so whìta, sukutere ala tuámó beterapó. Tépateti, Dẹi Kepe Wisiné yae dere ala tuẹ mutu betere so whì ti Kótótamo bóe fióló mo ti betere bete sóró hosaa muni deyóló mo dua beterapó.

⁷ Ti noatepae, tó tikiné ekẹlere ala yaai kisipa mutu betepa, ti Kótótamo bóe du beterapó. Atétere alané Kótóné tukóló muló betere fo aqomó bitini yóo, ai fo eraaire fotokọkélé buni yóo, erapó.

⁸ Tó tikiné yae dere ala sya fu betere so whíné Kótó hẹkese yaaire ala mo eranénipó.

⁹ Tépatēi, Kótóné Dẹi Kepe Wisi dią tuámó betepa, tó tikiné yae dere ala sya fóló ini, Dẹi Kepe Wisiné yae dere ala sya fóló du beterapó. Mepaae whi de tuámó Yesu Kerisoné Dẹi Kepe Wisi bitinipa, ti Yesu Kerisoné so whi meipó.

¹⁰ Naao mo tikita, dowi alané dóló sukunóo, naao kepe beteta, ti Kótóné donoratere alané kepaaróló beteróo, erapó.

¹¹ Yesu Keriso kepaaróló betemale sekéné melale Dẹi Kepe Wisi dią tuámó betepa, Kótóné Naalema kepaarótu yale kaae, ai Kepepaae dią kepaaróló beterae depa, diaaọ mo tó tikikélé kepaaróló, mo ti beterópóló yaalopó.

¹² Térapa norape-ó, Kótóné dą tao sóró eró betere wisi alamó ẹanémọ ẹpaae tokọ melaaire kwia mulapó. Atéreteiné ẹané tó tikiné ekẹlere alané noa alakó ẹapaae eró betepa, ẹanémọ ama erae dere ala sya fóló eraaloé? Até mo enénipó.

¹³ Ti noatepae, tó tikiné yae dere ala sya fupa, ti dią mo sukąalopó. Tépatēi, Dẹi Kepe Wisi fotokóné dią tao supa, ti diąné tó tikiné yaaire dowi ala diaaọ doló sukunatepa, ti dią mo betaalopó.

¹⁴ Ti noatepae, Kótóné Dẹi Kepe Wisiné ẹlisóró fu betere so whi, ti Kótóné ama naale senaaletóró beterapó.

¹⁵ Ti dią matepa sale Kepeta, momó wae sóró

kutó diratere whi beteróló, wiratere Kepe meni, Kótóné ama naale senaaletóró aleróló beterótu betere Kepe matepa salepó. Ai Kepe Wisiné dā tao sóró i fo yae depa, dāné fo fakeyóló, “Apa-ó! Aya-ó!” du beterapó.

¹⁶ Ai Dēi Kepe Wisi dāné kepetamo touyóló betāmó bitu, dāta Kótóné ama naale senaaletóró beterapó du beterapó.

¹⁷ Mió dātamo ama naale senaale betepa, ti Kótóné ama eraalopó ere ala wisi dokonóturaalu, Yesu Kerisopaae materetei dākélé saalopó. Take Kótóné ama kae ere dē wisinaale tuāmó dākélé Yesu Kerisotamo betāmó beterópóló, ą sekei ala su yale kaae, mió dākélé sekei ala siré fu beterapó.

Kótóné ere dē wisinaale tuāmó betaalopóló haġtu betere ala

¹⁸ Kótóné mo kae ere ala wisinaale dā tuāpaae hākearóló, eratere ala kelaai dapóló kisipa mutu, mió dāpaae i erótu betere sekei ala mo sawa ọla alerótu beterapó.

¹⁹ Aleyóló muló betere ọla ọla feané Kótóné ama naale senaale i ape yóló hākearatere kelaai dapóló, haġtamo bitu, kele kele du beterapó.

²⁰ Kótóné aleóló muló betere ọla ọla fea fo-maakei ala tuāmó beteralepó. Ai alata, atima kisipanétei ini, ai ala tuāmó beteraale sekéné ama kisipa mole ala sya fóló erapó.

²¹ Atéru, Kótóné aleyóló muló betere ọla ọla fea doróló aluraai mió dokóló mulapó. Atéretei, take Kótóné ama naale senaale dokoretei ter-aayóló ama kae ere dē tuāmó feléyóló betere ala

atimakélé saalopóló kisipa mutu, haĩtamo kaae tawóló betrapó.

²² Kótóné aleyóló muló betere ọla ọla fea touyóló so naale saai sisó nóló kaketu dere kaae, take keké nale alimó kaae sóró deté waleteti, mió i betere alimókélé kaketere ala hẹle yó taretei ẹnẹ kisi-parapó.

²³ Ama aleyóló muló betere mo ọla maaté mei, ẹa tuamókélé, Ẹi Kepe Wisi betereiteinẹ dele doasi sóró kaketu betrapó. Ti aita hẹle mei, Ẹi Kepe Wisita folosóró ọlumétẹre ọla iki nukutere kaae erapó. Atẹreteinẹ ẹa Kótóné naale senaale aleróló dape saaire be ẹ hapale analée yóló kaae taté fu betrapó. Ai be ẹmó Talenẹ ẹa dupu yaletetinẹ i daale tiki taaróló, kae tiki wisi saalopóló haĩtamo kaketu betrapó.

²⁴ Ti Kótóné ama ẹa tao sóró wisiróló betero betere beteta, take nalopaae eraaire wisi ala ke-laalopóló kisipa mutu, hẹkesetamo kaae taté fu betrapóló tao salepó. Atẹpatei, mepaae whinẹ wisi alatamo kelenẹ kolóló tuẹpa, ti ai ala ama sóró tareteinẹ kelenẹe dere fo momó kae enenipó.

²⁵ Tẹpatei, mepaae ala mió ẹnẹ sóró tani, take nalo saalopóló kisipa mutu, kaae taté fu betere ala hõni, hẹle bitirẹ fu betaalopó.

²⁶ Atẹtu betere kaae, moma yaaire fotokọ buni bẹruraalu, ẹnẹ hosaa tuamó ere ala kolónẹ enenipa Ẹi Kepe Wisinẹ ẹa tao suraalu, ẹkélé deletamo ketekẹ buóló, Kótópaae momarótu betrapó.

²⁷ Atẹtu betepa, ẹnẹ hosaa tuamó ere ala taletu betere Kótóné Ẹi Kepe Wisinẹ mole kisipakélé kolóló mo tuẹrapó. Ti noatepae, kale Ẹi Kepe

Wisiné Kótóné yaai kisipa mole alatóró sya fu-raalu, ama kae beteró betere so whị tao sóró Talepaae momarótu beterapó.

Kae kae sekẹi alané dą doraqsóró, Kótóné fotokóné tẹteró beterapó

²⁸ Ti noatepae, Kótópaae yaala sókó fu betere so whípaae kae kae ala erótu betere tuámó Kótóné atima tao saai wisi ala erótu beteretei dạné kisi-parapó. Ti ai so whịta, ama kisipa mole ala eraai ả beterepaae ape yalepó.

²⁹ Ti noatepae, mo taketitei ama kisipare so whịta, Naalema biture kaaetóró beterópóló, amatei atima wisiraté faai dapóló, tukóló mulélipakalepó. Atéreteita hẹle mei, ama ne nomarape kuamó ả topo naale beterópóló erapó.

³⁰ Mo taketitei ama kisi-pane ả beterepaae wópólópó yóló sóró beteriale so whịtóró ả beterepaae ape yalepó. Atéyale so whípaae me alakélé muni, mo donoi so whípóló beterialepó. Atéró sóró beteriale so whị tuápaae ti ama kae ere dẹ wisinaale eróló mo ti sụró beterapó.

³¹ Atérapa, ama ai eró betere doasi alamó, mió dạné noa fo yaaloé? Ti Kótó ảta, dapaae me ala eraqsóró tao sere sekẹ beterapa, né dạtamo bóe dóló só deraaloé?

³² Kótóné ama naalema mepaae whịné daqsóró sesé dere ala ini, dą fea tao saairaalu, ảpaae er-aaire ala erópóló, atimané naase tuámó mulalepó. Dą tao suraalu ama naalema melale kaae, dạné mepaae yạyẹtere alakélé ama hamokoróló tao sóró hẹle melaalomeipóló kisipa mute? Meipó. Ama mo melaalopó.

³³ Kótóné ama so whipóló sókó sóró kae beteró beteretei, né atimatamo fo tokóló só deranére? Ti Kótónétóró mo donoi so whipó du beterapó.

³⁴ Ti atimata, me alakélé muni, mo donoi so whipóló Kótónétei sóró beteró beterapa, né só der-aaloé? Yesu Keriso a mo ti sukaletei, Kótóné momó kepaaróló fea ala teteróló betere tiki, ama turu naase demó beteralepó. Aimó bituraalu, da só deratere ala yaqsóró, tao saaire fo Alima Kótópaae du beterapó.

³⁵ Yesu Kerisoné dapaae yaala sókó furaalu, eratere wisi ala mo eraqsóró, né sesénére? Me sekei alané ó hosaa tuamó mole sekei alané ó Yesuné doimó betepa sere susupui alané ó ɔla sóku alutere alimó wote dere alané ó kuti meiyóló tiki hɔle betere alané ó mepaae da dóló sukunatere kae kae ɔla ɔlané ó whi mo ti dóló sukunatere alanékélé sesénénipó. Mo meipó.

³⁶ I fo kaae asemókélé erapó.

“Tale-ó, da naao ala erótu berteremó, dapaae dia daalopó dere fo betere dokɔ fea hɔle yó tarapó.

Ti data, *sipsip* hupurape daai halikané kaae duló beterapóló,” erapó.

³⁷ Ai dosayayale alarapéné da mo ti doratere ala enénipó. Mo bóe dóló be torokó falatu dere kaae, ai alarape dané teteróló teraae faaire alata, dapaae yaala sókó furaalu wisi ala erale whi Yesu Kerisoné yale ala tuamó bitu, ti mo sumó enérapó.

³⁸⁻³⁹ Yɔlo i dere fota, mo dapóló tué tiki tiraaire fopa wosae. Sukutere alané ó betere alanékélé, *ensel*-rapené ó dowi keperapénékélé, mió i betere alimó du betere alané ó take waaire alimó yaaire

alanékélé, kae kae fotokọ bole keperapené ó sà taoró betere ọlarapenékélé, mo apaae derepale dolomó betó mole ọlaró Kótóné aleóló muló betere ọla ọla featamoné, Kótóné ama yaala sókó fale ala, dą tẹteróló kaae tare whị Yesu Keriso tuapaae tepeyóló, amamo dapaae yaala sókó furaalu, wisi ala mo eraqsóró, ai dosayale alarapené seséyaaire mo sunipó.

9

Kótóné ama mole kisipátoró sya fóló dere ala

¹⁻² Yálo i dere fota kapala mei, ẹ Yesu Keriso tuamó bitu, mo dapó. Ẹ dekené sukuturaalu, yálo hosaa tuamó delei ala hąle yó taretei, Dẹi Kepe Wisiné kolóló mo dapó du beterapó.

³ Yálo no nerape Israel fake so whị atima ẹ betere kaae wisiyóló beterópóló tao suraalu, ẹ Yesu Kerisotamo betamó betere ala tekeyóló kae beteratepa ti wisirapóló kisipa mutapó.

⁴ Ti ai Israel fake so whị Kótóné dape sóró ama naale senaale beteróo, ama kae ere ala wisi-naale atimané kolópóló yó melóo, Kótóné ama so whípóló atimatamo mo dirii fo dokóló mulaté wóo, ama tukóló muló betere fokélé atimapaae melóo, momatere bemó Talené doimó mepaae alarape erótu betae yóo, ama wisi ala atimapaae mo eraalópóló, yóló mulaté wóo erapó.

⁵ Ti atimata, Israel fake kaarale whịrapené deté wale so whípó. Ai fake sonéta, so whị tẹteróló kaae tawaaire whị Yesu Keriso mo whị tiki daai dealepó. Ti Yesu ąta, fea ala fea tẹteróló kaae tare

Kótó beterapa, ama mole doi wisinaale mo ti muó tanópóló, sóró horótu betae. Mo kée! Táyópóló yae.

⁶ Kótóné atimapaee i ala eraalopó ere fo ɥasókó felepóló kisipa mute? Mo meipó. Ti noatepae, kale whì Israel-né deyale naalerape fea betó moletei, atima Israel faketóro bitinipó.

⁷ Abraham-né deale naale senaale betó moletei, fea ama doi mole naale senaaletoóro bitini, mepaae ti ama doi munire naale senaale beterapó. Ašemó i fo mulapó. Kótóné Abraham-paae duraalu, “Aisak-né deyaaire naale senaale maaté ti mo naao naale senaale ai ape,” erapó.

⁸ Ai ere fo bete i ape. Abraham-né ama naale tamo dealetei, mo whìné naale senaale detere ala sya fóló deale naaleta, ti ama naale meipó. Kótóné Abraham-paae eraalopó yale fo dokonóturaalu deale naaleta, ti Kótóné ama doi mole naale senaalepó erapó.

⁹ Ti Kótóné ama mo eraalopó yóló mulale fo i ape. “È momó fesaae wouraaluta, mió yalo i tukóló mulatere be demótóro Sera ɥ naale mo sóró betepa kelaalopó,” fo ipakalepó.

¹⁰ Ai maaté mei, Rebekanékélé ɗané noutere Aisak-tamo betɔ be demó naale tamo deipakalepó.

¹¹⁻¹² Ai kale naale tamo betɔ be demó deyaaipatei, atimaamoné me wisi ala ó dowi ala initei, Kótóné ama mole kisipa sya furaalu, sókó su yóló kae beteraaire ala mo ti muó tanópóló, kale sopaae i fo ipakalepó.

“Naao topo naaleta, deke naalené kutó diratere whì betaalo ai ape,”

Ti Kótóné ama so wh̄ipóló sóró beteratere alata, wh̄iné dere ala kolóló dumitei, Talené ama kisipa mole alatóró sya fóló dua dapó.

¹³ Ai fo kaaetóró ašemókélé erapó.

“Yalo hosaa mo turó Jekop-paae muluraalu, Iso yalo h̄ekeseni h̄óralepó.”

¹⁴ Atérapa, mió d̄ané noa fo yaaloé? Kótó ̄ata, wh̄iné du betere ala donoyóló tale dumi, h̄oko taletere Kótópóló kisipa mute? Mo meipó.

¹⁵ Ti Kótóné Moses-paae i fo erapó.

“Yalo tao saai kisipa mole wh̄itóró k̄leturaalu tao saalopó. Ti k̄letere alata, yalo kisipa mole wh̄ipaaetóró dua dapó,”

¹⁶ Ti Kótóné tao sóró erótu betere alata, wh̄iné mole kisipa ó ketek̄e buóló d̄itere kutó kilituraalu dumitei, Kótó ̄a tuamó ere k̄letere alané tao sóró erótua dapó.

¹⁷ Kale aseyóló mole Kótóné fo tuamó topo wh̄i Feropaae i fo erapó.

“Naao du betere ala tuamó yalo bole fotok̄o h̄akearatepa, i hae kwiamó betó mole so wh̄i feané kolóló, yalo doi sóró horópóló, Isip hae naao t̄eteróló kaae tawae yóló ȳa topo wh̄i sóró beteró beterapó,” erapó.

¹⁸ Ti Kótóné ama k̄leaané k̄leturaalu tao sere wh̄i tao sóo, mepaae so wh̄i hosaa t̄aróló dow̄aae fole ala eraai depa, ti mo dow̄aae falóo, du beterapó.

¹⁹ Diakó bet̄a wh̄iné ̄epaae etei kaae fo enérápó. “Ai fotamo mo epa, Kótóné d̄ané yale dowi alamó d̄a só deratere ala, noatepa du betere? Ti at̄étepa

ama kisipa mole ala yaqsóró, mené sesé yaairetei mo sūnipó,”

²⁰ Ti ya noa kaae whi bitu, Kótópaae bi k̄atere fo dute? Kale doka haenétei wuti aletu betere whipaae “Naao noatepa ẹ etéró h̄oko aleyaleé?” fo enére?

²¹ Kale wuti aletere whiné ama bet̄a hae bula k̄ayóló mo ọla deyaaire wuti aleyóo, mepaae h̄ale h̄oko ọla deyaairetei aleyóo dua dapó. Ti ama ọla ereteiné ama kisipané alenére ọlatóró sūmó alenérápó.

²² Atétere kaae, Kótó ẹ fopaae buturaalu ama do-raai taketi bukóló kae beterale so whi kwia melaa kisipa mualepó. Ẹ atéró fopaae butu, kwia matere alaró fotok̄tamo so whi feané kolópóló hapale h̄akearóló ini, dua kaae taté fu betere alamó ɖané noa fo yaaloé?

²³ Aita h̄ale mei, Kótóné ama kae ere ɖe wisi-naale tuámó f̄aane wisi wisi ala ama k̄letu tao saaire so whiné tué yópóló ere alamó ɖané noa fo yaaloé? Ai so wh̄ita, Kótóné ama kae ere ɖe tuámó beterópóló, taketi tukóló muló beterápó.

²⁴ Atére so wh̄ita me kae mei, ɖatórótípó. Ti ɖa Juda fake maaté ẹ beterepaae ape ini, Juda meire fake so wh̄ikélé ẹ beterepaae ape erápó.

²⁵ Ȳalo i dere fo kaae, Hosea *buk*-mókélé Kótóné ama i fo erápó.

“Mepaae ȳalo so whi mei, kae fake so wh̄ipaae ȳalo so wh̄ipó yóo, take hosaa muni yale sopaaetei ȳalo hosaa mole sopó yóo, yaalo ai ape.”

²⁶ Atére kaae,

“Atima yało so whi meipó yale tikimótei dią mo ti betere Kótóné naale senaalepó yaalo ai ape.”

²⁷ Aisaiané Israel so whimó kisipa mutu, fo fakeyóló i fo erapó.

“Israel fake so whi mo hałe ọla kaae betó mupatei, betą betą so whi ti aluyaqsóró tao saalo ai ape.

²⁸ Ti noatepae, Talené i haemó betó mole so whiné yale dowi alamó kwia melaairetei ąsókó feni, hapale tétitóró mo turó melaalo ai ape.”

²⁹ Ti i bope yale ala Israel so whipaae eraai teópatei, mo take Aisaianékélé aseyóló muló beterapó.

“Hepen bemó betó mole bóe dele *ensel*-rape teteróló kaae tare Talené dą tao sóró, ama naale senaale beteróluąmeisóró, ti dą Sodom beró Komora betamo doróló wópu mulótu yale kaae uąpó,” erapó.

Israel fake so whi Talepaae kisipa tirénire ala

³⁰ Atérapa, mió dąné noa fo yaaloé? Juda meire fake so whi atimapaae Kótóné mo donoi so whipó yópóló, me wisi alakélé initei, Kótópaae betą kisipa tiki tiratere ala kilituraalu, mo donoi so whipó erapó.

³¹ Téyaleteti, Israel fake so whiné kale tukóló muló betere foné erae dere ala eratepa kilitu, mo donoi so whipó yópóló, keteke buóló du betaletei, donoi so whipó yaaire dąlemó sókó fenipó.

³² Ti noatepae, atima tué tiki tiratere ala ini, kale tukóló muló betere fo sya fupa saalopóló

kisipa mutu wóputu betaletiné sini ipakalepó. Ti atimatei kale kotóo sóró dée nalatere kane fakemó kotóo sóró dée nukua yalepó.

³³ Ti atima ai ere alata, i asemó mole fo kaaetóro erapó.

“Kotóo sóró dée nalatere kane fake Saion haemó yalotei i mulatapa kela. Ai kane fakemó so whi kotóo sóró dée nukua yaalopó.

Mepaae so whi dené ai seképaee kisipa tiki tiratepa, ti atétere so whi hale dere alakélé mo yaalomeipó,” erapó.

10

¹ No nerape-ó, Israel fake so whi aluyaosóro yalo hosaamó suraalu, Kótóné tao sópóló momarótu beterapó.

² Ti noatepae, atima Kótóné ala eraai keteke boletei yalo kelené diriyóló kolóló mo kisiparapó. Tépaitei, ai bole keteke, ama fo bete wosóló diriyóló tué iru meitei hale du beterapó.

³ Ti noatepae, Kótóné hale matere donoi ala atima tuéniru, atima dere wisi alamó Kótóné mo donoi so whipó yópóló kisipa mutu, wóputu betalepó. Téturaalu, Kótóné donoi so whipóló beterótu betere aomó sukóló bitini, dowaae fu betalepó.

⁴ Ti kale tukóló muló betere foné eraai yale ala fea mo dokonóló, Yesu Kerisoné amatóro eróló kemeralepó. Atére alata, mepaae so whi de apaae kisipa tiki tiratepa, Kótóné me alakélé muni, mo donoi so whipó yópóló erapó.

⁵ Kótóné mo donoi ala dere so whipó yópóló, kale tukóló muló betere fo erótu beteremó Mosesné i fo erapó.

“Me whínétamo kale tukóló muló betere fo sya fu betepa, ti ai foné erae dere ala fea hotowaró sya fóló erótu beterópóló yae,” erapó.

⁶ Tépatéi, tué tiki tiratere so whípaae me alakélé muni, mo donoi so whipó dere fo i ape. “Di-aaq hosaa tuámó etei kaae kisipa muaqsé. ‘Demaaté hepen-paae faaloé?’ ” dere fota, Yesu Keriso i haemó beterópóló dapesó dorowonére?

⁷ Me fo i ape. “Demaaté mo apaae derepaaloé?” dere fota, Yesu Keriso sukóló moletei i haemó beterópóló, mé whi hae dolopaae doropóló dapesó honére?

⁸ Até enénipa, Kótóné noa fo aseýóló muló betere? “Kale mo fo ya betere tikimó ai mole ape. Ai fota, naao kólómókélé buóo, naao hosaa tuámókélé muóo, ai ere ape.” Ti ai fota, me kae mei, dané diápaae Yesu Kerisopaae kisipa tiki tiróló betae yóló yó mótu betere fotórótípó.

⁹ Ti ai bete mole fo i ape. Mepaae whípaae naao kólónétei, “Yesu áta, dā tēteróló kaae tare Talepó,” yóo, ă mo ti sukāletei Kótóné momó kepaaró beterapóló kisipa tiki tiróo depa, ti so whi aluyaqsóro ama tao saalopó.

¹⁰ Ti noatepae, naao hosaa tuámó ăpaae kisipa tiki tiróo, me alakélé muni, mo donoi whipó yóo, naao kólónékélé ă etei kaae Tale beterapó dere fo wosetu, ama ya aluyaqsóro tao sóo yaalo ai ape.

¹¹ Ai dere fo kaaetóro asemókélé erapó.

“Mepaae whi de ăpaae tué tiki tiró betepa, atére whi haleróló só deraalomeipó.”

¹² Ti noatepae, Juda fake so whikélé, Juda meire fake so whikélé, teteroló kaae tare Tale mo betatóró bitu, me fake tao suraalu me fakemo sisópaae erótumipó. Mepaae so whiné apaae Tale-ó, ę tao sae depa, ti wisi ala faane Talené hamokoroló tao sóró wisi eraalo ai ape.

¹³ Ti noatapae,

“Mepaae so whi dené ata, etei kaae Tale beterapóló kisipa mutu, ‘Tale-ó, ę tao sae,’ depa, ti atétere so whi mo fea aluyaqsóró ama tao saalopó.”

¹⁴ Mepaae so whi atima kisipa tiró bitinire Talepaae Tale-ó, ę tao sae fo netéró yaaloé? Me whiné ata, etei kaae Tale beterapóló yó matere fo wosenitepa, apaae nétéró kisipa tiki tiraaloé? Ai fo wisi yó matere whi meitepa, ti atima nétéró wosaaloé?

¹⁵ Kale fo wisi yó melale fópóló mené dotonéni depa, ti atimanémo ai fo netéró yó melaaloé? Ai fo kaaetóró asémó erapó.

“Kale fo wisi yó maté kotere whirape dore tikikélé hōni, koteretei kilitu mo kokōné sukutapó.”

¹⁶ Tépatēi, mepaae Israel fake so whiné kale fo wisi wosóta dua yaletēi, ai fo aqomó sukóló bitinipó. Ti Aisaiané i fo asęyóló muló beterapó.

“Tale-ó, dané yó male fo némaaté wosóló tuę tiki tiraleé?” erapó.

¹⁷ Atépatei, kale fo wisi yó matepa wosetere alané ti tuę tiki tiratere ala kaaratapó. Ai fo wisita, Yesu Kerisoné me whipaae yó melae dere fotóró yó matepa so whi feané wosenérápó.

18 Tépatei, yalo diɔpaae wosetere fo i ape. Ai yó male fo atimané wosenié? Mei, mo wosipakalepó. I ere fo kisipa muae.

“Ai kale fo hae kwiamó betó mole so whị feané wosópóló deté kwɛalepó.

Ai fo wosóló, atimanémo i hae kwia feamó betere so whịpaae yó maté kwɛóló mo sɔralepó,” erapó.

19 Kale yale kaae diɔpaae momó wosetere fo i ape. Israel fake so whịné kale fo wisi wosóló kisipa inié? Folosóró Moses-né ašemó Kótóné i fo erapó.

“Mo doi munire so whịpaaetei yalo wisi ala eratepa kilituraalu, ɔɔpaae eróluɔ alatei atimapaee eratapóló diaaɔ dei tuɛ muaalo ai ape.

Diɔ fopaae buópóló, yalo fo tuɛnire so whịpaae wisi ala eraalopó,” erapó.

20 Aisaia ɔ halaainé daalu i fo erapó.

“Ẹ kelaai kekenitere so whịnétei ẹ kolóló tuɛ yalepó.

Ẹ kisipa yaaitapóló yó ɔlae fo ini yale so whịpaaetei ẹ etei kaae Kótó beterapóló yó malepó,”

21 Tépatei, Kótóné Israel fake so whịmó kisipa mutu, ama i fo erapó.

“Betere dokọ fea atima yalo dere fo wosóló aqomó bitini, dowɔae fu betere so whị yalo dape saairaalu, naase bukó tapatei, atimané yalo dere fo woseni, mo ti dowɔae fu beterapó,” erapó.

11

Kótóné mepaae toróti Isarael fake so whị kọleyalepó

¹ Atérapa, yálo diápaae wosetere fo i ape. Kótóné ama so whị hóróló mo ti taaraleé? Mo meipó. Ti ẹkélé Israel fake i betere ape. Ẹta, Abraham-né deale naalené deté wale whị Benjamin fakené deale whípó.

² Atima teó deyaaipatei, mo taketi Kótóné ama kisipa yale so whị hóróló mo ti taarénipó. Ti Elaijané yale ala aṣemó moletei kisipa muae. Kótóné Israel fake só deróló kwia melópóló kisipa mutu, Elaijané i fo erapó.

³ “Tale-ó, naao fo eratere kóló whịrape atimané dóo, yápaae moma yaai aleóló muló betere kane fakekélé fisikóló taae falóo yalepó.

Téturaalu, ẹ betá ḥasókó fóló betepa, mió atimané ẹkélé dóló aluraai du beterapó,”

⁴ Ai fo depa, Kótóné Elaijapaae noa fo ipakaleé?

“Kapala kótó Baal-paae bukutiri teṛó tale-ó yóló, moma initere 7000 whíkélé atimané daṣóró ẹpaaetóro moma yópóló, yálo atima tao sóro kae beteralepó,” erapó.

⁵ Take ai ala ere kaae, mió i alimókélé Kótóné ama kisipa mole ala sya furaalu, hamokoróló ḥale tao sere alané mepaae toróti so whị amatei sókó sóro kae beteró beterapó.

⁶ Ti ama so whị atéro kae beterale alata, Kótóné ama hamokoróló ḥale tao sere alané erapó. Ti aita, whịné dere wisi ala kolóló inipó. Motamo wisi ala deremó uṣóró, ti Kótóné ama hamokoróló tao sere ala ḥale ọla aṣ uṣpó.

⁷ Atérapa, mió noa ala ere? Israel fake so wh̄iné saai dapóló ketekę buóló kekitu betale ɔla sinipó. Téyaleteti, Kótóné ama so wh̄ipóló sókó suyóló kae betemale so wh̄iné maaté salepó. Mepaae so wh̄iné hosaa ti Talené amatei t̄aralepó.

⁸ Atére ala ašemó erapó.

“Atimané kisipa tikikélé, Kótóné mo ti keyóróló okokoróo, kelenékélé me ɔla kelaqsóro dilikiróo, wosélinékélé dere fo wosaqsóro mo ti kinóo yaleteti, mió i alimókélé ai alatóro h̄ale erapó,”

⁹ Depit-nékélé i fo asęrapó.

“Atimané ɔla nokole alata, atima daaitere he alée f́oo, kotóo sóro dée nalatere kane fake alée f́oo duraalu, atimatei só deróló kwia melópóló yae.

¹⁰ Atima kelenékélé me ɔla kelaqsóro kele mo ti dilikiróló, atimané sekę beleyóló furaalu, sisó mo ti k̄aae wale nisi deretei h̄ale yó tanópóló yae,” erapó.

H̄ale botokore ni, d̄alo nitamo olekeyale fo

¹¹ Térapa, ȳalo dīapaae i dere fo wosae. Atima atéró dée naleteti mo ti muó tawaleé? Mo meipó. T́eni, atima dowi ala maaté du betepa, Kótóné tao sere ala Juda meire fake so wh̄ipaae erótu beterapó. Israel fake so wh̄iné ai ala kilituraalu, atimapaee erólūa alatei kae fake so wh̄ipaae eralepóló, atima kisipa s̄ópóló Kótónétei eralepó.

¹² Juda fake so wh̄i atima Talené fo wosetere h̄oyóló dowi ala du betaletiné, Kótóné ama wisi wisi ala i haemó betó mole so wh̄ipaae erótu beterapó. Ai erótu betere ala Juda fake

so whípaae melaai yaleteti, Juda meire fake so whípaae malepó. Ai Juda fake so whi mo turó Talepaae momó fesaae waletaimó, i haemó betó mole so whípaae waaire wisi wisi alata, take folosóró erale wisi ala bosenóló, mo dekeró fāyóló saalo ai ape.

¹³ Diā Juda meire fake so whípaae i dere fo wosae. Ēta, diā tuāmó Talené fo erópóló *aposel* whi sóró beteró betereteiné, ama ala yālo diāpaae eróló fakerótu beterapó.

¹⁴ Aita hāle mei, yālo fake so whiné diā tuāmó du betere wisi ala kaae, dākélé enée dere so whi mepaae Talené tao sópóló kisipa mutu, ketekētamo erótu beterapó.

¹⁵ Ti noatepae, Talené Juda fake so whi kapala hóróló sisópaae eraleteiné, i haemó betó mole so whi Kótótamo bóe fiyóló betāmó beterapó. Ai ala mo epa, ti atima dape sere be demó sukóló mole so whi kepaarótu dere kaae eraalomeipóló de?

¹⁶ Ti folosóró bulatere *flawa* o kāae sóró kwia Talepaae matepa, ai matere kwia Talené amapóló wisiróló kae mulóturaalu, mepaae hāle mulaleteikélé fea amapóló kae muló beterapó. Atétu dere kaae, ni bete Talepaae matepa, Talené amapóló wisiróló kae mulóturaalu, ni teteikélé kae ai muló betere ape.

¹⁷ Ti diāta, mo dālo *Olip* ni tej mei, hāle botokore *Olip* ni tej tukó sóró mo dālo *Olip* ni tetejrapetamo daalópóló, mepaae tetejrape tukó faróló, tālemó olekeyalepó. Ti ai olekeyale ni tej horatere fēta, kale bete daale *Olip* tikimó kaaróló mótua dapó.

¹⁸ Atérapa, diā olekeyale tetejrapené mepaae hāle ere tetejrape tēteróló bopé fakeyaqse.

Diɔtamo bopé faketepa, ti yało i dere fo wosóló kisipa muae. Bete diriyóló daalópóló diɔ tetejrapené fotokóró bitini, tetejrape daalópóló, betené fotokóró beterapó.

¹⁹ Ti me whiné etei fo enérápó. “E etéró olekeyóló daalópóló, mo tetejrape tukó faralepó,”

²⁰ Aita mo deretei, atima tué tiki tiréni yaletéiné Kótóné tukó faróló, diaaɔ kisipa tiki tiró betere alané diɔ olekeyóló daalapó. Atérapa, me whi teteróló bopé faketera ala ini, winé sukutu Kótó aqómó betae.

²¹ Ti noatepae, Kótóné ama dɔlo ni tetejrape kɔle duraalu bokó sóró taaréni, mo tukó faralepó. Atéyale kaae, diɔkélé tukó faraalomeipóló de?

²² Ti Kótó ɔta, kɔleturaalu taosóro wisi ala eróo, dowi ala deremó deteraayóló kwia matere alakélé yóo dapóló kisipa muae. Yesupaae kisipa tiki tiréni, haepaae derepele so whipaae Kótóné dowi kwia melóo, diɔ ɔpaae kisipa tiró betepa ama kɔlené sukutu tao sóo yaalopó. Atérapa, diɔ ama tao sere ala taaróló feni, ai wisi ala tuamó hɔle betó tawae. Aténitepa, ti Kótóné diɔkélé tukóló taae faraalopó.

²³ Ti ai kale tukó farale tetejrape atima tué tiki tiréni, dowaae fu betere ala taaróló, momó kisipa feteyóló ɔpaae tué tiki tiratepa, ti kale tukó farale tɔlemó Kótóné momó sumó olekenérápó.

²⁴ Ti noatepae diɔta, hɔle botokore *Olip* ni tetej tukó sóró, dɔlo *Olip* ni tɔlemó olekeyaaitere ala mo hapólupatei olekerapó. Kale mo dɔlo *Olip* ni tɛi tukó farale tɔlemó momó olekeyaaiterei hapólu ini, ama mo sumó olekenérápó.

Kótóné Isarael so whị tao saalopóló yale fo

²⁵ Norape-ó, dià bopé faketuraalu mepaae so whị só deraqsóró, kinóló mole ala diaaọ kisipa yaasepóló, hakearóló i dapa wosae. Talené mepaae Israel fake so whị atima hosaa mo ti tǎró betere ala hǎle epa, ti mepaae Juda meire fake so whị Talené ama dǎle muló beteretei fea sǔmótóró ǎ beterepaae wapa, atima hosaa tǎretei Talené momó feteraalopó.

²⁶ Atéturaalu, Israel fake mepaae turó aluyaqsóró tao saalo ai ape. Ai fo kaae asēmó erapó.

“Tao saaire whị Saion be taaróló wouraalu, Jekop fake so whinė Kótó sisópaae erale ala kemer-aalopó.

²⁷ Atima aluyaqsóró yǎlo tao saalopóló muló betere dirii fo i ape.

Atimané dowi ala yǎlo tokóló aluraalopó,” erapó.

²⁸ Juda fake so whị atima kale fo wisi hóróló sisópaae eratereteiné diatamo bóe du beterapó. Atima Juda fake so whinė kale wosetere fo wisi-tamo atéró bóe du betepatei, Kótóné ama so whípóló sorokó su yóló kae beteró betereteiné ama hosaa mole naale senaalepóló, yaala sókó fu beterapó. Ti aita, take noumatererapepaae i ala mo eraalopó yóló mulale fo sya furaalu du beterapó.

²⁹ Ti noatepae, Kótóné ama so whípaae hǎle matere ala ama tué feteyóló momó tokó sóo, ama kutó diraai ape depa wale so whípaae, dià fae yóló hǎkonatere alakélé yóo dumipó.

³⁰ Juda meire fake so whi diä take betale alimó Kótóné fo aqmó sukóló bitini, ama fo tikitu betalepó. Tétu betaleteti, mió Juda fake so whi Kótóné fo aqmó sukóló bitini, dowæae fóló du betale alané Kótóné diä kolené sukutu tao saaire tų mulalepó.

³¹ Atére kaae, mió Kótóné diä kolené sukutu tao sale alané take atimakélé kletu tao sópóló, mió Kótóné fo tukóló dowæae fu beterapó.

³² Atéró dowæae fu betepa, Kótóné kolené sukutu atima mo fea tao saairaalu, fo tukóló dowi ala du betere tuamó beterapó kisipa muópóló, so whi fea ai ala tuamó sóró beteralepó.

Kótóné doi sóró horatere ala

³³ Kótóné dotoróe fóló mole tuę tiki beteró fea ala bete tuęre alatamo ama kaepó.

Téruraalu ọla ọla fea tale dere alaró ama du betere alatamo né taleyóló kisipa yaaié?

³⁴ “Talené ama mole kisipa turó né kisipa ere?

Kótóné ama du betere ala wisiyóló yópóló né yó maleé?

³⁵ Mé whiné Kótóné ọpaae momó tokó melópóló, me ọlakó melaleé?” erapó.

³⁶ Ti noatepae, Talené so whikélé, yó mole ọla ọlakélé mo fea amatóró kaaró beterapó. Ai ọla ọla fea ama fotokóné teteróló kaae tapa yó mulapó. Betere ọlanékélé, ere ọlanékélé ama kisipa mole alatóró erópóló erapó. Atérapa, ai sekéné ama doasi doi hẹle muó tanópóló yae. Mo kée! téyópóló yae.

12

Dané betere bete turó Kótópaae hẹle matere ala

¹ Térapa norape-ó, Kótóné dā kōlené sukutu tao sóró erótu betere wisi ala kilitu, hupu ó na simó sukūlaa daaróló Talepaae mótu dere kaae, diā mo bitutei, diaaḡ hó, naase, tuē tikikélé, hosaakélé fea Talepaae ḡle melaasepóló i dere ape. Atétepa, Talené ala erótu mo kae so whi beterepa, ama kolóló ḡkeseyóló senérapó. Ti aita, Talené diāpaae ḡle eró betere alamó kisipa mutu, ama doimó mo donotóró dirótu betere kutó ai ape.

² Tétu, i haemó betó mole so whiné du betere ala diāné tokóló ini, take muale dowi kisipa taaróló, mió wisi kisipa muóló betae. Atétepa, ti Talené kisi whi aleróló beteraalo ai ape. Atéró bitu, kae kae ala fea diānétei taleyóló ita, Talené ama yaai kisipa mole alapóló kaae kolóló, tuē yaalopó. Kótóné kisipa mole alata, mo ala wisinaale, dā mo whiné eratepa, ti ḡ mo ḡseke yaalo ai ape. Ama kisipa mole ala mepaae yaḡaḡi, mo sūmótóró mulapó.

³ Ti noatepae, Talené hamokoróló epaae melale kutó diróturaalu, diā feapaae i dere ma fo wosae. Kótóné apaae kisipa tiki tiratere ala yópóló, diā feamó betā betā yóló aliró beterapó. Atérapa, dere ala fea yałotóró sūmó enérapóló, me whi só deróló bopé fakeni, Talené ya tuāpaae sūratepa i kutó sūmó dinérapóló kisipa muae.

⁴ Dā so whi fea mo betā tikitóró daalapó. Ai betā tikimó hó naase, kae kae tiki fea daaletei, ai tikirape feané betā kaae alatóró dumi, kae kae ala dua dapó.

⁵ Atéru ere kaae, dā fea Yesu Keriso tuāmó mo betā tikitóró daayóló beterapó. Dā Keriso so whi fea olekeyóló betā tikitóró daaleteiné no netóró

beterapó.

⁶ Dá feané Kótóné ala erópóló, amatei hāle hamokoróló kae kae kutórape dokoralepó. Mepaae whi Kótóné kóló whi bitu, Talené fo i ape yóló yó matepa, ama tué tiki tiró betere bete mole fo donotóró sya fóló erótu beterópóló yae.

⁷ Talené kutó diratere so whirape bipi yaqósóró, tao sere kutó meló betepa, ti ai kutótóró dirótu betae. Mepaae so whipaae Kótóné fo yó matere ala meló betepa, ti so whipaae yó matere alatóró du betae.

⁸ Mepaae so whipaaetamo Talené ala erótu beteretei taaréni, yó tanópóló ketekē bulatere ala meló betepa, ti ketekē bulatere fotóró du betae. Mepaae so whipaae so whi tao sóró hāle matere ala yópóló meló betepa, ti nalo kwia saai dapóló kisipa muóló meni, hāle sae yóló meló betā yae. Mepaae so whipaae so whi tēteróló kaae taru ālisóró fole ala meló betepa, ti kisipa ai alapaaetóró mulóló, mo hotowaró kaae tawae. Mepaae so whipaaetamo so whi kōlené sukutu tao sere ala meló betepa, ti kutiri teraae fóló, hāitamo tao sere ala du beterópóló yae.

Ne nepaae yaala sókó furaalu mo alatóró erótu betae

⁹ No nepaae hāle tó tikiné maaté yaala sókó feni, hosaa tuāmó mo alatóró muluraalu, yaala sókó fu betae. Atétu, dowi ala mo ti sisópaae eróló, wisi ala betā botokó sóró tawae.

¹⁰ Diaaq no nepaae yaala sókó fóló, u tao su i tao su dere ala hāle yó tawae. Nao no hamomané

wisi ala du betepa, naao doi haepaae deróló ama doi sóró horóló, ă dukirótu betae.

¹¹ Talené ala erateretei, de kayóló hõni, Dêi Kepe Wisiné diaağ kepe bete tuamó ketekę bulatepa, diaağ ama ala erótu beteretei si kaae hãle dó tanópóló yae.

¹² Take nalo Talené ăapaae wisi ala mo er-aalopóló kisipa mutu, sekęi ala wapakélé me ęla meipóló hãle belée taru, hãiné sukóló momatere ala betă suka fea yó tawae.

¹³ Kótóné ama kae beteró betere so whı mepaae ęla ęla yağatepa, naao moletei bukóló hãle melae. Mepaae uké wale so whı naao bepaae wisi kisi-patamo dape sóró ęla melóló firae.

¹⁴ Mepaae so whinė ăapaae kae kae sekęi ala eratepa, Talepaae atima doraе fo ini, tao sae yóló wisiraterе fotei yae.

¹⁵ Hãiné sukutu, mo kée du betere so whıtamo ăăkélę hãitere ala yóo, de kęné sukutu moló du betere so whıtamo ăăkélę moló yóo, du betae.

¹⁶ Diaağ no netamo betă kisipa muóló dua betóo, bopé fake dere ala ini, doi muni sókó deyóló betó mole so whıtamo fulumuyóló betamó betóo dere ala hó yağse. Naaotei ya fea ala fea tuęre whıpóló, naao kisipanétei mepaae so whı só deratere ala mo yağse.

¹⁷ Mepaae whinė ăapaae me dowi ala eratepa, ăpaae momó tokó matere ala ini, so whı feané keletómó mo wisi ala maaté erótu betae.

¹⁸ So whı featamo mo betă kisipatóró muóló, naao hosaa muni deyóló betere ala enépa, ti naao dere ala mo dua bituraalu du betae.

19 Norape-ó, menétamo diappaee sekei ala eratepa, kwia tokó matere ala ini, Kótó ą fopaae buturaalu, ai kwia ama melópóló taalae. Ti noatepae, Talené ašemó i fo erapó.

“Mepaae whínétamo dowi ala eratepa, ti kwia tokó matere kutóta yałopó,” erapó.

20 Atérapa, kwia tokó meni,

“Naao bóe whítamo wotetepa, ti ąla melóo, wẹi nokolepa, ti wẹi melóo yae.

Ti naao ąpaae ai eratere wisi alané ama hosaamó saalopó.

Atéro eratere ala ti ama topomó si kelerape hupó kaae horóló muaalopó,” erapó.

21 Dowi alané ya só deraqsóró hotowaró kaae taru, wisi alanétei dowi ala tẹteróló alurópóló yae.

13

Tẹteróló kaae tare whịrape aqómó betae

1 So whị fea tẹteróló kaae tare *Gavman* whịrapené dere fo wosóló, dią fea atima aqómó sukóló betó muae. Ti noatepae, ai whịrape fea atéro so whị tẹteróló kaae tanópóló, mo whinė sóró beteréni, Kótónétei ai tẹteróló kaae tare kutó melóo, ai whịrapekélé sóró beteróo erapó.

2 Atépatei, mepaae whítamo ai tẹteróló kaae tare whịrape aqómó bitini, bóe du betepa, ti ai whịrapetamo maaté dumitei, Kótóné eró betere alatomokélé bóe dilapó. Atéro bóe dele alamó atima só deróló dowi kwia melaalopó.

3 Ti noatepae, mepaae donoi ala du betere whịrapeta, kale tẹteróló kaae tare whịrape kolóló wi dumitei, fo tukóló dowi ala du betere whịrape

ti witua dapó. Kale tẹteróló kaae tare whịrape kolóló diạ wini, halaaíné betaai kisipa mutepa, ti wisi ala du betae. Atétepa, ti atimané ya whị wisipóló dukiraalo ai ape.

⁴ Ti atima, Kótóné kutó diratere whị bitu, diạ wisiyóló beterópóló, wisi ala erótu betere whịrapepó. Tépateti, diạ dowi ala du betepa, ti mo wi yae. Ti noatepae, ama ai tawóló kutu betere sepake haḷe tarapóló kisipa mute? Ti ẹta, Kótóné kutó diratere whị bitu, dowi ala dere so whịtamo fopaae buóló kwia matere ala yópóló, Kótónétei ẹ sóró beteró beterapó.

⁵ Térapa, da so whị fea kale tẹteróló kaae tare *Gavman* whịrape aqomó betae dereteita, i betené dapó. Naao mo dere alamó kwia melóo, naao iniyale alamókélé hosaa tuamó mole kisipanétei diạ só deróo yaqsóró, atima aqomó betenérápó.

⁶ Me i alamókélé diạ wituraalu, *takis moni* mótua dapó. So whị tẹteróló kaae tare *Gavman* whịrapeta, Kótóné kutó diratere whịrape bitu, betere dokọ fea so whị tẹteróló kaae tare alatóró deté fu beterapó.

⁷ Mepaae doasi doi mole whịrapepaae eraaire ala mupa, ti feané mo erae. Ai alarape i ape. Atimané diapaae *takis moni* etéró ẹlae depa, ai sọtóró melóo, mepaae tómó beleróló ẹlae depakélé melóo, mepaae ala tẹteróló kaae tare whị betepa, ti ai whị kolóló witu, ẹ aqomó betóo, mepaae tẹteróló kaae tare whị doasi doi mupa, ti ai whị mo doasi doi muópóló hale horóo du betae.

Ẹ waaire be de felekerapa, ne nopaae yaala sókó fu betae

⁸ Mepaae whiné nalo tokó melaai dapóló sale ɔla kwia mupa, ti ai kwia h̄ale muó tawaɔsóró hapale tokó melaē. Ti yaala sókó fole ala bet̄a kwia tokó melóló kemeraaire ala meipa, ne notamo yaala sókó fole ala h̄ale yó tawae. Ti noatepae, mepaae whiné ama be wh̄i so wh̄ipaae yaala sókó fole ala du betepa, ti kale tukóló muló betere foné yae dere ala mo ai dokonatere ape.

⁹ Kale tukóló muló betere forape i ape.

“Nópu nokole ala yaɔse, Wh̄i dóló sukunaɔse, ɔlémi naɔse, Mené ɔla senée yóló au naɔse,” erapó.

Mepaae tukóló muló betere forape fea husiró betere mo topo ala i ape.

“Naaotei ȳa yaala sókó fu dere kaae, so wh̄i feapaae atéró yaala sókó fu betae.”

¹⁰ Mepaae whiné ama ne nopaae yaala sókó fu-raalu, wisi ala eratepa, ti atima doratere ala mo yaalomeipó. Atéró yaala sókó fole ala du betepa, ti kale tukóló muló betere foné yae dere ala mo turó dokonatapó.

¹¹ Mió i bitu du betere ala bete diriyóló kisi-paru, yaala sókó fole ala du betae. Ti noa betené dumi, d̄a Talepaae kisipa tirale be d̄emó kaae sóró bitiré wóló, mió d̄a tao sóró dape saaire be d̄e mo felekemó sókó walapó. Térapa, noke firetei turukó horóló kele diriyóló betae.

¹² Mió kale be d̄e sókó wouraalu, diliki mo felekemó kemeraai dapó. Térapa, diliki tuamó bitu du betere ala tu d̄epaae mulóló, b́oe daai wase dakorótu dere kaae, kale d̄e tuamó mole ala wisi dīané bopémó dakeró betae.

¹³ Dá dẹ tuámó kisipa wisi muóló betere so whiné dere ala kaaetóró du betae. Dià so whị fea fo dokóló dowi wẹi nokole alaró so nópu nokole alatomokélé, so ó whị nópu nokole alaró kae kae sonaalei alatomokélé, hẹle sere alaró dei tuẹ muóló alale sere alatomokélé momókó yaqse.

¹⁴ Ai dosayale dowi alarapekélé, mepaae naao tó tikiné ekẹlere alakélé netéro yaaloé yóló tuẹ teketu bitini, dá tẹteróló kaae tare whị Yesu Keriso betà kuti kaae deróló betae.

14

Kisipa tiró betere ala dirire whịró fotokọ buni bére whịtamo

¹ Kótóné i ala yae ó yaqse fo hakearóló inipa, me whiné ama kisipa tiró betere ala béruraalu, ama tuéné etei kaae ala dopa yaalomeipó dere kilitu, taleyóló só deraqse. Ténì, mo nopóló dape sae.

² Me whị ama kisipa tiki tiró betere alané fea ọla sumó nenérapóló nńo, me whiné ama kisipa tiki tiratere ala fotokọ buni béruraalu, kutómó bilitere mo ọla maaté nńo, dua dapó.

³ Fea ọla nokole whiné kutómó bilitere ọla maaté nokole whịtamo dei kisipa mutu, ẹ eróló belei aqraqse. Atétu dere kaae, fea ọla nénitere whiné fea ọla nokole whíkélé só deraqse. Ti noatepae, ai whịta, Kótóné ama naalepóló dape sóró beteró beterapó.

⁴ Yẹ noa kaae whị bitu, me whiné kutó diratere whị só deróló taletere ala du bitute? Ai whị ẹ tẹteróló kaae tare whịnétoró taleyóló ẹ só deróo, só deréni yóo, enérapó. Ti noatepae, me whiné ẹ

só deratere ala yaalomeitei, diriyóló beterópóló Talené betà fotokò bulatere ala enérápó.

⁵ Mepaae whiné betà be de Talené ama dale muló beterapóló kisipa muóo, me whiné mepaae be dekélé fea betà kaaepóló kisipa muóo du beterapó. Dià betà betà so whiné noa kaae be de mo dono be depóló kisipa mutepa, ti ai kisipatóró sya fenérápó.

⁶ Me whiné betà be de mo doasi be depóló kisipa mutepa, ti à teteróló kaae tare Talepaaetóró kisipa mutu dapó. Mepaae whi hupu, na, ba, nukupa, ti à teteróló kaae tare Talepaaetóró kisipa mutu, mo kée yóló nukulapó. Mepaae neni were whikélé Kótópaaetóró kisipa mutu, mo kée yóló we dapó.

⁷ Ti noatepae, dakó mo betà whikélé ama kisipa mole ala yaai dapóló ama kolenétei betóo, betà whi sukutepakélé, ama kolenétei sukò dumipó.

⁸ Dà betere alakélé, sukutere alakélé, ti Talené ama kele tómótóró erapó. Térapa, dà hale betepa ó sukutepakélé, Talené ama so whitóró beterapó.

⁹ Ti Yesu Keriso à sukóló momó kepaayóló betereteita, ti betere so whiró sukale so whitamo teteróló kaae tare Tale betaairaalu, erapó.

¹⁰ Ata, atére Tale betepa, naao noné dere ala ó mole tué tiki taleyóló, dorapóló noatepa só derótu betere? Ó dià mepaae so whinékélé diaaq no nené ere ala kolóló, diàta, ẹ kaae mei beleipóló só derótu bitute? Ti noatepae, dané du betere ala Kótóné tale yópóló, dà fea à beterepaae betà betà yóló fóló, daaneta yaalopó.

¹¹ I fo aseýóló muló beterapó.

“Èta mo Tale bitu, yało i dere fo haşókó feni, mo yaaitere fotóró diapaee dapa wosae.

So whi mo fea ę beterepaae wóló bukutiri tearó bitu, yaťa etei kaae Tale beterapó fo mo yaalo ai ape,” erapó.

¹² Atéturaalu, da so whi dokó feané du betale ala Kótóné taletepa, dané yale alarape ama keletómó daalu, danétei dosayóló eneta yaalopó.

¹³ Téyaalopa, dané ne noné dere ala taleyóló u só derale i só derale du betereitei mo taalae. Téní, naao du betere alanétei naao no nené tuę doróló dée nalaşsóró, naao dere ala ti tuę tekeyóló yae.

¹⁴ Ti ęta, Tale Yesu Keriso tuamó bitu, fea ęla naaireitei fo muni, featóró nenérapóló yało mo diriyóló kisiparapó. Tépatei, mepaae whi ama kisipané mepaae ęla doreteiné naalomeipó depa, ti ai whi ę were ęla mo nenénipó.

¹⁵ Yesu Keriso sukóló tao sale no hamoma naao ęla nokole alané doraşsóró yae. Mepaae naao no ne were ęla nokoletiné atima tuę tiki doróló sekęratepa, ti ya tuamó yaala sókó fole ala mo munipó.

¹⁶ Naao mo wisi ala depatei, me whiné naao dere ala kolóló ę dée nukupa, ti naao ę dée nanalepóló ya eratere fo yaşsóró, naao dere ala kisiipa tekeyóló yae.

¹⁷ Ti noatepae, Kótóné teteróló kaae tare tuamó, ęla nokole alaró *wain* wei nokole alatamo doasi bete munipó. Tépatei, Dęi Kepe Wisiné da tuapaae erótu betere mo donoi alakélé, hosaa muni deyóló mo dua betere alakélé, haíné sukutere alakélé, i alarape feata, ti doasi bete mulapó.

¹⁸ Atéreteiné mepaae whị dené Yesu Kerisoné ala eróturaalu, i dosaaté wale alarapetamo du betepa, ti Kótókélé hẹkese yóo, mo so whịnékélé wisi ala dapóló ya dukiróo yaalopó.

¹⁹ Térapa, diaaọ mepaae du betere alané hosaa muni deyóló mo dua betere ala epa, ti ọ feané Talené ala eraté fóló, mo dirii whị betaaire ala betọ ketekẹ buóló eróló fakeraalopa siépe.

²⁰ Kótóné so whị tuapaae erótu betere ala mepaae ọla nokole alané doraọsóró yae. Nokole ọla fea doni, nenérapó. Tépatei, naao ọla nokole alané mepaae were whị dée nalatepa dorapó.

²¹ Hupu, na, ba, *wain* wẹi nokole ala ó mepaae dere alanékélé, naao no dée nenérapóló kisipa mutepa ti taalae.

²² Térapa, ọla nokole ala, ó wetere ala, ó kae kae be demó me ala yaọsóró ọale mole alakélé, me noa kaae ala naao mopóló kisipa tiki tiró betepa, ti ọaró Kótótamo tuamó betọ erópóló yae. Mepaae whịné wisirapóló kisipa muóló dere alanétei ọ só derénipó depa, Kótóné wisiró beterapóló hajiné sukutu beterapó.

²³ Tépatei, mepaae whị de tuẹ tamo mulu, Talepaae tuẹ tiki tiró betere ala sya furaalu, wisirapó kisipa muni hoko nukupa, ti ai whị dowi ala dapó. Ti ọané du betere ala fea tuẹ tiki tiró betere alatóró sya fóló initepa, ti dowi ala dapó.

15

¹ Ọa tuẹ tiki tiratere ala fotokọ bole so whịné ọa kisipa felé yaaire ala maaté ini, mepaae tuẹ tiki tiró betere ala bére so whịné ené inire ala tao sóró eratepa mo wisirapó.

² Dá dokọ feané ne no hamoma hẹkese yópóló, wisi ala eraté fu betenérápó. Atétepa, ti ama tuẹ tiki tiró betere ala mo fotokọ buturaalu, ẹ dirii whi bitiré faalopó.

³ Ti noatepae, Yesu Kerisonékélé amatei ẹ kisiipa felé yaaire ala ini, dapaae wisi ala eróturaalu ẹ sekei ala salepóló asẹmó erapó.

“Mepaae so whiné yẹ faleyóló dowi fo du be-taleteita, mo ẹpaaetóró eralepó,” erapó.

⁴ Ti noatepae, take asẹyóló muló betere fo feata hẹle ini, ẹanẹ dosayóló kisiipa sópóló erapó. Aita Talené ala eró taruraalu, ama asẹre foné matere ketekẹ ẹ tuamó boleteiné take dapaae wisi ala eraalopóló hẹiné sukutu beterapó.

⁵ Térapa, hẹle yó tare alaró ketekẹtamo matere Kótóné ẹi Yesu Keriso sya fu betepa, ẹi fea mo betẹ kisiipatóró muóló betere ala erópóló yae.

⁶ Até iruraalu, ẹi feané hosaa tuamó betẹ kisiipatóró muóo, betẹ fotóró yóo deremó, ẹ tẹteróló kaae tare whi Yesu Kerisoné Alima Kótóné doi hale horaalopó.

⁷ Atérapa, Kótóné doi hale horaairaaalu, ẹ tẹteróló kaae tare whi Kerisoné ẹi dape su yale kaae, diaaokélé mepaae no ne hamoma wisiyóló dape sae.

⁸ Ti noatepae yẹlo i dere fota, kale Juda fake kaarale noumatererapepaae yóló mulale fo mo dokonóturaalu, Kótóné ama ere fo so whiné mopóló diriyóló kisiipa yópóló, Yesu Keriso ẹ Juda fake so whiné kutó diratere whi alée felepó.

⁹ Ti Yesuné ai ere alata, Kótóné atima Juda meire fake so whi kọlené sukutu tao salepóló, ama doi

doasi mulópóló erapó. I dere fo kaae ašemókélé erapó.

“Atéreteiné ẹ Juda meire fake tuámó bitu, yálo naao doi doasi mulóo, naao doimó wole fo wisi wisi yóo, du betaalo ai ape.”

¹⁰ Ai fo kaae me i ape.

“Juda meire fake so whi-ó, diákélé ama so whitamou touyóló hajné sukutu betae.”

¹¹ Kale fo kaae me i ape.

“Dià Juda meire fake so whi-ó, i haemó betó mole so whi featamo Talené doi hale sóró hor- atere wole forape du betae.”

¹² Ai fo kaae Aisaianékélé erapó.

“Jesi betemó kaayóló sókó holaaitere whiné i hae kwia feamó betó mole so whi tẹteróló kaae tawaalopó.

Atépa, Juda meire fake so whi atimapaee take ama wisi ala eraalopóló hai kisipa mutu, ẹpaee tuẹ tiki tiróló betaalopó,” erapó.

¹³ Take ẹpaee wisi ala eraalopó du betere Kótópaae diané tuẹ tiki tiró betepa, ti ama hosaa muni deyóló dua betere alaró hajné sukutere alatamo diapaee eróló mo sùrópóló yae. Atéturaalu, kale Dẹi Kepe Wisiné dià fotokọratepa, take nalopaae Kótóné ẹpaee wisi ala eratepa kelaalopóló dere hai mó ti ẹayóló sùturaalu, feleyóló fópóló yae.

Pol Juda meire fakepaee Talené fo yó male feletei

¹⁴ Yálo norape-ó, dià tuámó wisi ala ẹayóo, mo fo bete turó diaaọ kisipa yóo, kisipa tikikélé mo fosó fosó yóo ere ala yálo kisiparapó. Téru, diásisi

ketekę bulóturaalu, ma fo u du, i du dere alakélé mo enérápóló kisipa mutapó.

¹⁵ Mepaae doasi bete mole forape diaaọ kisipa epatei, mo ti diriyóló tuę yaasepóló, ę halaainé diąpaae momó ai aseýale ape. Ti noatepa meipó. Ę Juda meire fake so whị kuamó, Yesu Kerisoné kutó diratere whị bitu, ama fo wisi yó maté kwęyópóló ai kutó Kótóné hamokoróló ępaae hąle melóló ę sóró beteralépó.

¹⁶ Até ereteita, mo so whịmó Talepaae momaratere whịrapené kẹlaa wisi wópóló simó sukulaa dalótu dere kaae, Kótóné kale fo wisi Juda meire fake so whịpaae yąlo erótu beteralépó. Aita hąle mei, ai fo wisi wosóló sya fupa, ti Dẹi Kepe Wisiné atima wisiróló kae beteratere ala Kótóné kilitu, ita hąle matere ọla wisipó yópóló kisipa mutu, du beteralépó.

¹⁷ Ę Yesu Keriso tuamó bitu, Kótóné ama so whịpaae i erótu betere mo bete mole kutópóló dukiróló hale horótu beteralépó.

¹⁸ Mepaae yąlo initere ala diąpaae yaalomeitei, Juda meire fake so whị Kótóné fo aqmó sukóló betérópóló, tẹteróló kaae tare whị Kerisoné ę fotokoratepa, yąlo foró yale alatamo diąpaae i dere ape.

¹⁹ Kale Dẹi Kepe Wisiné ę fotokoratepa, kae kae kelemei alaró doasi sira yaaire alatamo eróturaalu, Jerusalem bemó kaae sóró yó maté fóló, Ilirikum hae kwiamó sókó felepó. Téturaalu, Kerisoné fo wisinaale mo turó yó maté kwęyalepó.

²⁰ Mo take yąlo enée yóló muté wale kisipa i ape. So whị tẹteróló kaae tare whị Keriso tuę inire be huluapaae kale fo wisi yó maté kwęyaai yalepó.

Atéyaleiteita, hãle mei, me whĩné diyale kutó kwia kemeróló ditu dere kaae, yaaire hótepa yalepó.

²¹ I dere fo kaae ašemókélé erapó.

“Àta etei kaae whĩpóló mené yó matepa kilini yale so whĩnétei ă kolóo, etei kaae whĩpó depa woseni yale so whĩné ama fo wosóló ă kisipa yóo yaalo ai ape.”

²² Ẹ taketitei diă beterepaae waai yalemó, ai alara-pené bi bi duraalu wénipó.

Pol Rom-paae faai tale yaletei

²³⁻²⁴ Tépatei, i hae kwiamó tẹ mole be hulua dokọ fea Talené fo yó maté kwẹyóló sùreteiné mió me kutó diyaaire tẹ munipa, ba fo dokọ fea yalo diă kele wonée du betalepó. Téyaletei, mió me kutó diyaaire tẹ munipa, Spen hae kwiapaae faai wouraalu, diă keleté waai kisipa mutapó. Ti ẹ diă beterepaae sókó wóló, mepaae be dẹ diătamo ekei yóló beteró, nalo ẹ faaire tikipaae fupa, mepaae yayare ọlarape diăné tao saasepóló dapó.

²⁵ Até yaai waairaalu, mió Jerusalem bemó Kótóné kae beteró betere so whĩpi tao sene fulapó.

²⁶ Ti noatepae, Jerusalem bemó Kótóné kae beteró betere so whĩ kuamó, mepaae yolealere so whĩ hãle tao suraalu, Masedonia hae kwiaró Akaia hae kwiatamomó Kótóné ama kaae beteró betere so whĩ atima kisipanétei hẹkesetamo *moni* deràleta yalepó.

²⁷ Atéró atima wisi kisipatamo deràleta yale *monita*, take folosóró Juda fakené atimapaae erale wisi ala kwia mulapó. Ti ai kwiata, folosóró Juda fakené Juda meire fake so whĩ atimané kepe tuápaae Talené wisi ala eralepó. Atéyale alamó,

Juda fakepaae momó tokó móturaalu, atimamo tao sóró yāyare ɔla matepa, mo wisirapó.

²⁸ Aita, ɛpaae diyae yale kutó ereteiné atima haɣtamo ai *moni* sere ala kolóló, ɛ Spen hae kwia-paae faai wouraalu diɔ keleté waalopó. Ti ai *monita*, folosóro dotɛyale *aposel* whɛrapené ditere kutómó oleyale du ai ape.

²⁹ ɛ diɔ beterepaae wale sukamó, so whɛ tɛteróló kaae tare whɛ Kerisoné eratere wisi ala ɛ tuámó faayóló mo sɛratepa, diɔpaae eraai waalopóló kisipa mutapó.

³⁰ Térapa, no nerape-ó, da tɛteróló kaae tare whɛ Yesu Keriso tuámó betere alaró Dɛi Kepe Wisiné matere yaala sókó fole alatamo ɛ tuámó moleteiné diɔpaae sɛtere fo dapó. Ti noatepae, yaalo yaaire ala yaqsóro sekɛi alané sesétu beterepa, diɔkélé ɛtamo ai sekɛ tuámó bitu, Kótóné ɛ tao sópóló momatu betae.

³¹⁻³² Ti ɛmó momaraaitere ala i ape. Judia fake Kótóné fo woseni haɛ betó mole whɛrapené ɛ daqsóro momaróo, Jerusalem bemó kae betero betere so whɛ tao sóró melaaire *moni* atima wisi tuétamo sópóló momaróo du betae. Téturaalu, Kótóné ama kisipané ɛtamo diɔ beterepaae wópóló depa, ti wóló, da fea ekei yóló sɛa wisi nóló beterepóló, momatu betae.

³³ Térapa, hosaa muni deyóló mo dua betere ala mótu betere Kótó diɔ featamo beterepóló yae. Mo kée. Táyópóló yae!

16

Pol-né ama fulumu whɛrapepaae kɔleó yale fo

1-2 Kenkria be huluamó betó mole Keriso so whiné kutó diratere so dāné ne Fibi-ta, mo so wisipó. Atérapa, Kótóné kae betero betere so whiné mepaae so whi mo wisiyóló dape su dere kaae yóló, əkélé Tale tuamó betere sopa, mo wisiyóló dape sae yóló i dere ape. Atéturaalu, ą me ala ó me ɔlakó yaya depa, ti diaaą ą tao sae. Ti noatepae, ąta so whi fea tao suraalu, əkélé mo wisiyóló tao su betere sopó.

³ Yesu Kerisoné doimó ętamo betamó kutó diratere so Pirisilaró oma Akuilatamopaae kɔleó yae.

⁴ Ti atimaamo mené ɔlépatei witere ala ini, halaainé ęt tao su betalepó. Atéteremó, yalokélé mepaae Juda meire fake Keriso so whínékélé, atimaamoné yale alamó Talepaae mo kée du betera-pó.

⁵ Atimaamoné bemó touraleta du betere Keriso so whipaaekélé kɔleó yae. Yalo hosaa mole no Epainetus-paaekélé kɔleó yae. Ti ąta, Esia hae kwiamó betó mole so whi Yesu Kerisoné doimó Keriso betaaipa, folosóró ąpi Keriso betale whipó.

⁶ Dią tao saai kisipa mutu, depe tukó wei kutó diale so Mariapaae kɔleó yae.

⁷ Ę fake whi ęt yale kaae, *dipula* beteraleseké Adronikus-ró ama soma Junias-tamopaae kɔleó yae. Ti atimaamota, ęt Yesu Keriso tuamó betaaipa folosóró Keriso bitu, kale *aposel* whirape betere tuamó mo doasi doi mole soró whitamopó.

⁸ Tale tuamó bitu, yalo mo hosaa mole no Ampliatus-paae kɔleó yae.

⁹ Dá Yesu Keriso tuámó bituraalu, betá kutó ditere whi Urabanus-ró yálo mo hosaa mole no Stakis-tamopaae kóleó yae.

¹⁰ Yesu Keriso tuámó betepa, kaae kolóló whi wisipó du betale seké Apelesipaae kóleó yae. Aristobulus-né be whi so whipaaekélé kóleó yae.

¹¹ Yálo fake whi Herodion-paae kóleó yae. Narsisus-né bemó betó mole mepaae Tale tuámó betere so whipaae maaté kóleó yae.

¹² Tale tuámó bitu, mo depe tukó wei kutó ditu betale so tamo Tipaenaró Tripasa-tamopaae kóleó yae. Me yálo mo hosaa mole ne Tale tuámó bitu, mo doasi depe tukó wei kutó ditu betale so Persis-paaekélé kóleó yae.

¹³ Tale tuámó betepa, sókó sóró kae beró betere whi Rufus-ró hamatamopaae kóleó yae. Ti ama hamata, yálo hae kaae bitu, ẹ tao su betale sopó.

¹⁴ Asinkritus, Flekon, Hermes, Patrobas, Hermas-sépi, atimatamo betó mole mepaae norapepaaekélé kóleó yae.

¹⁵ Filolokus, Julia, Nereus-ró ama nemata-mokélé, Olimpás-kélé, atimatamo betere Talené kae beteró betere so whi feapaaekélé kóleó yae.

¹⁶ Kótóné ama kae beteró betere so whi bitu, kóleó yóló apuóló, diasisitei kóló u tukó nuku, i tukó nuku du betae. I bemó betó mole Keriso fake so whinékélé diá feapaae kóleó i dere ape.

¹⁷ No nerape-ó, diapaae yó male mo bete mole fo wisi mupatei, mepaae kae kae hoko fo yó matere whirapené diá betámó beteretei tekeróló, diaaq du betere wisi ala taaróló, diá dée nalaqsóró, tika

kae bitu, ai whīrape mo hotowaró kaae tawae.

¹⁸ Ti noatepae, atei ala du betere whīrapeta, dā tēteróló kaae tare whī Yesu Kerisoné kutó diréni, atimané yaaire ala maaté ekeleyóló du beterapó. Atéru, mo bete mole fo diriyóló tuénire so whī dilikóló hāle mulóturaalu, mo felei foró dukiratere fotamo du betere whīrapené diā kópaae falaqsóró wisiyóló kaae tawae.

¹⁹ Diā fea Kótóné fo wosóló aqomó sukóló betó mulapó dere fo, i bemó betó mole so whī feané wosalepó. Diā ai ala erapóló deté fole fo yālo wose-turaalu, ę mo doa hāiné sukutu beterapó. Térapa, dowi ala mulapóló, só derané inire so whī bitu, wisi ala betā yaai, kisipa fosó fosóre so whītóró betae.

²⁰ Mo hosaa muni deyóló dua betere ala mótu betere Kótóné Satan tēteróló, diaaq hó aqomó beteratere ala mo felekemó yaai dapó. Dā tēteróló kaae tare whī Yesu Kerisoné hamokoróló hāle tao sere ala diā tuāpaae erópóló yae.

²¹ Ętamo betā kutó ditere whī Timotinékélé, yālo be whī Lusias, Jeson, Sosipata, atimanékélé diāpaae kōleó dapó.

²² I fo ašerale whī ę Tertius dā tēteróló kaae tare Tale tuamó bitu, yālo diāpaae kōleó dapó.

²³ Ękélé, mepaae imó betó mole Keriso so whīkélé, dā fea touróló ọla nukua dere be tale Kaius-né diāpaae kōleó dapó. I doasi be huluumó *moni* tēteróló kaae tare whī Erastus-ró dāné no Kuartus-tamoné diāpaae kōleó dapó.

²⁵ Yesu Kerisoné yale ala i ape yóló, mió yālo yó mótu betere fo wisi diaaq wosetu betepa, Tal-ené ama ai fonétei diā diriyóló beterópóló, fotokọ

sumó bulalérapó. Atére alamó ama doi doasi muópóló yae.

²⁶ Ai ala wisita, mo take bitiré wale whirapené kilini, kinóló moletei mo ti betó tare Kótóné ama fo eratere kóló whirapepaae i fo asẹ yae depa asẹ ipakalepó. Aita hẹle meipó. So whi feané i fo dosayóló kisipa duraalu, kinóló muale ala i haemó betó mole so whi feané Yesu Kerisopaae tuẹ tiki tiróló ẹ aomó bitu, ama ala eraté fu beterópóló hakearó beterapó.

²⁷ Atére Kótó betẹ fea ala fosó fosóre bete tale beterapa, ama doasi doi hẹle muó tanópóló, ẹa Yesu Keriso tuamó bitu, hale sóró horótu betae. Mo kée, téyópóló yae!

Yesu Kerisoné So Whi Tao Sere Kisi Fo Wisi
The New Testament in the Falopa Language of Papua
New Guinea

copyright © 2005 Wycliffe Bible Translators, Inc.

Language: (Folopa)

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2009-10-31

PDF generated using Haiola and XeLaTeX on 18 Mar 2025 from source files dated 31 Aug 2023

0102a9df-173c-5a64-b766-14ab67a86105